

# *KUZABA KILUMBU YA BENO*

## *MPE NSANGU YA YAWU*



Mbote, bankundi. Beto bikana kaka ya kutelama mwa ntangu fyoti.

Nzambi ya luzolo, na yina beto, na kati ya kuningana ya mutindu ya nene yayi ya luzingu, sala poze na mwa bantangu yayi ke landa to ngunga, nyonso yina ya lendaka vwanda, yina Nge me kubika samu na beto, samu na kupesa lukumu mpe nkembo na Nge, kulonga Ndinga ya Nge, kuzaba Nge kulutila mbote, ya kele samu na yina beto me vukana na suka yayi. Beto ke tonda Nge, Nzambi, samu ti ya kele na bantu yina me yilama mpe me kubama samu na kwiza kuwa. Ata bakondisyo mpe ntangu, mpe yina na kati beto kele na kuzingila, bawu ke kwikila dyaka. Mpe beto ke tonda Nge samu na bawu.

<sup>2</sup> Nzambi, beto ke vutula matondo na Nge samu na ngolo ya Nge ya nene ya kubeluka, bansilulu ya Ndinga ya Nge. Mutindu bantima ya beto ke pela ntangu beto ke kuwa bimbangi yayi! Bampasi ya mutindu na mutindu yina me natama na zulu ya bana ya muntu! Nge, mpe lemvo ya Nge mpe ngolo, mpe na nsilulu ya Nge, me belusa bawu. Mpe bawu kele awa, ke na kupesa kimbangi, ke na kupesa lukumu na Nzambi. Beto ke tonda Nge samu na yayi.

Mpe ntangu yayi bika ti beto, bubu yayi, kuwa Nsangu yina Nge me kubika samu na beto samu na ngunga yayi. Na yina beto ke tanga na Ndinga ya Nge, bika ti Nge pesa beto dibanza ya yina beto ke tanga. Bika ti luzolo ya Nge kusalama na bima nyonso, samu ti beto me lomba yawu na Nkumbu ya Yesu. Amen.

Beno lenda vwanda.

<sup>3</sup> Ya kele bweso na kuvwanda awa na suka yayi. Mu kele na kyese mingi samu na beno nyonso. Mpe Mpangi Wood, Mpangi Roy Roberson, bampangi mingi yankaka, me sala na mutindu ya kukwikama bilumbu zole me luta, na kusalaka baklime na yinzo yayi ya nene samu na lukanu yayi, samu ti Lumingu me luta bawu monaka mutindu beno talaka mpasi. Mpe bawu vwandaka na mwa mbongo na kibumbulu ya dibuundu, mpe bawu kwendaka sala kosalu mpe tulaka yawu samu beno vwanda mbote, na kubakaka mbongo yina beno ke tulaka na dikabu, samu beno vwanda, na kuwa Nsangu. Ya ke na madidi mingi bubu yayi kulutila yina ya vwandaka na ntangu yina. Na yawu beto ke vutula matondo na Nzambi, mpe na beno bantu, samu na bweso yayi.

4 Mu ke na kiese . . . Mpangi Roy Borders, yandi vwandaka zola kuvwanda kuna na manima na suka yayi. Mpe mu tubaka na yandi na kubaka kiti ya yandi mpe kuvwanda awa na milongi yayi, kasi yandi zolaka ve kusala yawu. Mutindu beno nyonso zaba, Mpangi Borders ke monikisaka beto na bilanga ya kulonga. Mu kele na kiese mingi na kuvwanda na Mpangi Borders, mpe balongi mingi yankaka mpe bankundi ya munu.

5 Na kati ya lumingu mu—mu vwandaka banza, mpe mu tubaka, “Ntangu mu ke kuma kuna, na Lumingu, mu ke zaba konso mulongi, konso muntu.” Na yina ntangu beno ke kuma awa, beno ke kuma mingi na kati ya Nsangu ti beno ke zimbana kaka nyonso, na kutala, na yawu yina ya vwandaka.

6 Ntangu yayi mu fwana vutuka na Arizona. Mu fwana vutuka na Kilumbu ya ntete ke kwiza, lumingu mosi, kuvutuka na Tucson, samu na kunata bana kuna samu na lukolo. Mpe mu ke vutuka kuna na manima ya yawu. Mpe kento ya munu fwana vwanda kuna na ntangu ya mbote, samu na kubanda. . . samu na kusonika bana, balumingu zole ntete lukolo kubanda. Mpe munu, na manima, mu ke vutuka samu na mwa ntangu fyoti awa.

7 Mpe na ntangu yayi yayi kele ntangu ya munu ya kupema. Mutindu beno zaba, mu me longa kubanda Ngonda ya kumi na zole; Ngonda ya ntete, Ngonda ya zole, Ngonda ya tatu, Ngonda ya yiya, Ngonda ya tanu, Ngonda ya sambanu, mpe Ngonda ya sambwadi. Ntangu yayi, kana Nzambi kuzola, mpe kana ti ya kele ve na mbokolo ya mutindu yankaka, yayi kele nsungi yina mu—mu—mu ke bakaka kupema ya munu, konze ya munu. Mu ke kwendaka na kuzomba. Mpe mu . . .

8 Ntangu yayi kana Mfumu lendaka bokila munu na kima yankaka, bima yina ke vwanda ve na konte. Nzambi kele ntangu nyonso ya ntete. Mpe mu zola ti Yandi vwanda ntete, mpe beno zola ti Yandi vwanda ntete. Kasi na yina kana ya kele ve na mbokolo mosi, mpe yina kele luzolo ya Yandi, ya kele yina mu ke sala ntangu yayi mwa bangonda zole yayi ke landa, ya ke vwanda kukwenda kuzomba ntangu yayi, samu mu pema. Mu . . .

9 Beno ke bakula ve, yinza ke zaba ata mbala mosi ve, na yina mu fwana lutila. Beno me mona? Mpe ya kele kaka tensyo mingi. Kuyituka ve ti Mfumu tubaka na bilandi ya Yandi, ntangu Yandi vwandaka tambula na bawu, “Beni kwenda ntama na ntoto ya kuyuma, beno pema fyoti.” Beno me mona? Mu ke bakulaka yawu mingi, konso kilumbu, mpe ya kulutila na yina bilumbu ya munu ke kuma mingi na zulu ya ntoto, beno me mona. Na kukumaka kiboba, beto ke bakula yawu. Beno ke kuwa pasteur ya beto kutuba “amen” na yawu, mpe. Yandi, beto, lenda bakula ti beto kele ve bana ya babakala na manima beto me luta bamvula makumi tanu. Ntangu yayi beto fwana kuzwa mwa ntangu.

<sup>10</sup> Beto ke vutula matondo mingi samu na bimbangi yina beto me kuwa. Kento ya munu vwandaka kuna na Mama Wood, mazono, ntangu bantu yankaka katukaka kuna na Alabama, kisika mosi na kati kuna, mpe vwandaka zonzila na bima ya nene yina Mfumu salaka na lukutakanu yina, na bana ya fyoti yina belukaka, mpe bima ya mutindu na mutindu. Mpe bima mingi yina, oh, ya ke baka kaka ntangu ya yinda samu—samu na kutuba yawu.

<sup>11</sup> Mpe dyaka mu fwana bambuka moyo ti. . . Mu banza ti bantu tubaka na munu ti Mpangi ya kento Larson vwandaka awa Balumingu zole na mwa bébé. Mu zaba ve, kasi mu banza ba tubaka ti ya vwandaka mutekolo ya yandi, mu banza, samu na mbiekolo, me katuka na yandi na Chicago. Mama yango me vwanda kieleka mbote na beto, mpe beto ke sepela na yandi. Mpe yandi me katuka na mwana ya bebe na Chicago, samu na mbiekolo. Mpe, yandi na kutala me kuzwa mwa ntangu ya mpasi na kunata yandi, mu banza, samu na mbiekolo, kasi yandi zola mwana yayi kuzwa lusakumunu ya Mfumu. Na yawu kana Mpangi ya kento Larson zola, na yina mu ke na kuzonzaka, kana yandi zola kaka kunata mwana yango samu na kisalu ya mbiekolo yayi.

<sup>12</sup> Mpe na yina, na kutala, na yina yandi ke na kukubamaka, Mu—mu zola tuba ti yayi me vwanda Nsangu ya kulutula ngolo yina mu me mekaka ntete na kukubika, tii mazono na nkokila. Lumingu ya muvimba, mu ke kota na bilo, samu na kumeka na kuzwa ntangu na manima ya bambokolo ya munu mpe nyonso, samu—samu na kumeka na kuzwa kima na dibanza ya munu samu na ngunga yayi. Mpe na ntangu mu ke kwenda, mu—mu vwanda lenda ata ve. . . Dibanza ya munu vwandaka mpamba. Mpe, mazono, mu kwendaka na yinzo ya yisi. Mu banzaka ti mwini vwandaka ngolo mingi, na yawu mu kwendaka kuna na yinzo ya yisi, mu vwandaka kuna. Mpe mu vwanda meka na kubaka Biblia ya munu mpe kutanga, mpe mu vwanda lala. Na yina mu ke vumbuka mpe mu ke kunwa maza, mpe ke meka na kuningisa munu mosi, mpe kukwenda na ngaanda mpe ke tambula fyoti, mu vwandaka na nkotolo.

<sup>13</sup> Muntu mosi lutaka mpe talaka munu ya kukondwa simisi ya munu, mu vwandaka ya kuvwanda na nkotolo; tiya vwandaka mingi. Ba ningisaka diboko na kupesa munu mbote. Mu zaba ve kana ba ningisaka diboko na kupesa mbote to ve. . . Muntu mosi, ya lendaka vwanda muntu mosi awa na kati ya mbanza, to ya lendaka vwanda muntu mosi ya dibuundu, yina ningisa diboko na kupesa munu mbote. Mpe mu—mu vwandaka banza mingi, mu—mu losaka kaka meso na ditoma, vwandaka luta. Mu ningisaka diboko na kupesa mbote.

<sup>14</sup> Mazono na nkokila mu kotaka na ditoma mpe kwendaka tambula na Charlestown, samu na kumeka na kuzwa kima. Mfumu, yawu monanaka ti, yandi zolaka tuba na munu kima

mosi, kasi munu. . . Satana vwandaka meka na kutelama na nzila ya munu, samu na kukanga munu na kusala yawu. Na yawu mu banzaka, “Mbote, kana yandi sala yawu, mu ke landila kaka na kuingila, ke landila kaka na kuingila, na kubulaka na mwelo tii Yandi ke zibula.” Na yawu kuna kaka na mwa ntangu fyoti me luta, to kaka fyoti pene ya ngunga ya sambwadi na suka yayi, mu vumbukaka kieleka na suka-suka.

<sup>15</sup> Mazono, mu vwandaka fyoti ya kubela, mu mekaka. . . Mu kudyaka mwa masangu yina simbaka kaka na munu ve, ya vwandaka kieleka tiya mingi, mpe mu—mu vwanda meka na kuzwa ngolo na zulu ya yawu. Mpe—mpe na yina na suka yayi, pene ya ngunga ya nana, mu me kubwa na Disonuku yina me yitukisa munu. Mpe mu me tala dyaka Disonuku yina, mpe dyaka Yawu me yitukisa munu. Mpe mu me kwenda, na kulandaka Yawu na nzila ya Masonuku, mpe mu me manisa kaka mwa baminuti fyoti me luta. Na yawu ya lendaka vwanda ti Mfumu kele na Nsangu samu na beto, na suka yayi, ti Satana me meka na kutelemina beto.

Nge zola kunata mwana ya fyoti awa, Mpangi ya kento Larson? [Kisika ya mpamba na bande—Mu.] Nzambi vwanda na bawu mpe sadisa bawu.

<sup>16</sup> Ntangu yayi mu vwanda me baka beno, Lumingu me luta, bilumbu zole, mpe mu banza. . . to, balukutakanu zole, na suka mpe na nkokila, mpe yina kele ngolo samu na beno. Mu me kuwa ti ya. . . Bayankaka na kati ya beno fwana kuzyeta ntama, mpe kukondwa kisalu kilumbu mosi, mpe nyonso yina. Na yawu ata ti beto ke kwenda na Lumingu, na Kilumbu ya ntete, lumingu mosi, mu ke samuna kaka lukutakanu ya Lumingu ke kwiza, kana Mfumu kuzola, beno me mona, kana ti dibuundu ke zola kuvwanda dyaka na nkokila yayi. Beno me mona, yina, yina me tala. . . Beno kele mingi!

Bantu yikwa ke zola mingi kuvwanda na nkokila yayi, beno bika beto mona, beto kuzwa balukutakanu na nkokila yayi? Ntangu yayi, bayina ke zola mingi ya vwanda na Lumingu ke kwiza, beno telemisa diboko ya beno na manima? Ooh! Oh, ya kele ya kukangama. Uh! [Muntu mosi me tuba, “Ya kukangama, mpangi-bakala!”—Mu.] Yinki nge ke tuba? [“Sala nyonso zole.”] Uh! [Mpangi Ben Bryant me tuba, “Sala yawu na nkokila yayi, mpe dyaka, na lumingu ke kwiza, Mpangi-bakala.”] Nge mpe, nge mpe, Ben!

<sup>17</sup> Mu kele na Nsangu yayi, ya kele yinda, na suka yayi, kasi mu—mu zaba kaka ve mutindu. . . Mpe mu zaba ti mu sadisaka na misiku ya dibuundu, kasi kuna na kati, kana beno ke tala, mu tubaka, “Kana mu ke na kusalaka bande.” Beno me mona? Na yawu, yayi ke na kubakamaka na bande. Uh-huh. Na yawu mu banza ti beto ke meka na kuvutuka bambala zole, na nkokila yayi mpe Lumingu ke kwiza, kuna, kana Mfumu zola, beno me

mona. Ntangu yayi, kana beno kuzwa ve nsangu lumingu yayi, na yina beno kwiza Lumingu ke kwiza.

<sup>18</sup> Mu ke zolaka ve ti beno kwiza bambala zole mutindu yina, kasi mu ke kuwa ya me bikana na beto kaka mwa ntangu fyoti dyaka. Mpe beno bambuka kaka moyo, kana ntangu kukwenda na ntuala, beto ke kuzwa bweso yayi ntangu ya yinda mingi ve. Beno me mona? Beno bambuka moyo, kima mosi ke salama. To luyalu ke kanga beto, to Satana ke kwiza na kati-kati ya beno mpe kumwangisa beno. Ya ke vwandaka ntangu nyonso mutindu yina. Beno me mona? Kima mosi ke salama, na yawu beto sepela na konso muniti yina beto kele kintwadi.

<sup>19</sup> Na yawu ntangu yayi samu na bayina fwana vutuka na bayinzo ya beno, na nkokila yayi, ya ke vwanda mutindu Lumingu me luta na nkokila, Mu vwandaka kaka na Nsangu mosi ya nkufi. Mpe na yawu, beno, kana beno zola yawu na bande, na yina, ya kieleka beto ke fidisa beno bande kana beno fwana vutuka na yinzo. Beto kele ve. . . Mu ke longa na nkokila yayi, kana Mfumu kuzola.

<sup>20</sup> Mu vwandaka na note mazono, to—to kilumbu na ntuala ya mazono, mwa Nsangu yina mu sonikaka ya mabanza ya kima mosi, mpe ya me kuma bilumbu mingi. Ya kele na Bansangu zole, na kutala. Ya kele mutindu na kati-kati, mosi ya yawu kele, “Dibulu ya maza,” to dyaka, “Kukuna mupepe mpe kubuka kitembo,” kaka Nsangu mosi ya Nsangu ya mbote. Suka yayi kele ya kulongoka. Mpe na yawu, na nkokila yayi, mu ke longa na, “Kukuna mupepe mpe kubuka kitembo,” to, “Dibulu yina ke na kubasisa maza.”

<sup>21</sup> Mpe, na suka yayi, mu zola kutanga na Masonuku ya Santu ntangu yayi.

Mpe beno ke kuwa mbote? Beno tuba, “Amen.” [Dibuundu me tuba, “Amen.”—Mu.] Mbote.

Ntangu yayi mu zola ti beno, na Babiblia ya beno, beno baka na munu na Buku ya Osée, beno bayina zola kutanga. Mpe ti beto tanga mwa banzila na kapu ya 6 ya Buku ya Osée, profete.

Na yina beto telama.

<sup>22</sup> Nzambi ya luzolo, beto kele ya kulunga ve na kubaka Buku yayi na maboko ya beto, samu ti beto ke tanga na Masonuku ti muntu ve na Mazulu to na ntoto, to na yisi ya ntoto, vwandaka ya kulunga to mpe na lenda ya kubaka Buku, to mpe na kutala Yawu. Oh, mpe kuna kwizaka Mosi yina vwandaka mutindu mwana-dimeme yina kufwaka; Yandi bakaka Buku, samu ti Yandi vwandaka ya kulunga, mpe Yandi zibulaka Bidimbu ya yawu. Mpe beto ke vingila Yandi na suka yayi na kumonisa dibanza ya bima yayi yina me sonama na kati ya Buku, samu ti ya kele Buku ya Mpulusu. Bayina nyonso ba me vulusa kele ya kusonama na kati. Bika beto kuzwa kisika ya beto, na suka yayi,

na ntangu yina beto ke na kuzinga. Samu beto me lomba yawu na Nkumbu ya Yesu. Amen.

*Beno kwiza ntangu yayi, mpe beto vutuka na MFUMU: samu ti yandi me pasula, mpe yandi ke belusa beto; yandi me bula, mpe yandi ke kanga bamputa ya beto.*

*Na manima ya bilumbu zole yandi ke yamba beto: na kilumbu ya tatu yandi ke vumbula beto, mpe beto ke zinga na ntuala ya yandi.*

*Na yina beto ke zaba, kana beto landila na kuzaba MFUMU: kukwenda ya yandi kele mutindu suka; mpe yandi ke kwiza na beto mutindu mvula, mutindu mvula ya nsuka mpe ya ntete na ntoto.*

*O Ephraïm, yinki mu ke sala na nge? O Juda, yinki mu ke sala na nge? samu ti mambote ya beno kele mutindu dituti ya suka, mpe mutindu kinoko ya ntete yina ke kwenda.*

*Na yawu mu ke bula bawu na nzila ya bapofete; mu ke kufwa bawu na nzila ya bandinga ya yinwa ya munu: mpe balufundusu ya nge kele mutindu nsemo yina ke basikaka.*

*Samu mu vwandaka na nsatu ya kyadi, mpe munkayulu ve; mpe luzabu ya Nzambi kulutila minkayulu ya kuyoka.*

*Kasi bawu ke zola bantu yina ke vwenza ngwisani: bawu me—bawu me sala mutindu miyekudi na ntuala ya munu.*

*Galaad kele mbanza ya bayina ke salaka disumu ya nkú, mpe me beba na menga.*

*Mpe mutindu bankonga ya babandi ke vingilaka muntu, mutindu mosi kimvuka ya banganga-Nzambi ke na kufwa na nzila na kundima: mpe . . . ke sala mambu ya yimbi.*

*Mu me mona kima ya boma na yinzo ya Israel: ya kele kindumba ya Ephraïm, Israel me sumuka.*

*Mpe, O Juda, yandi me fidisa ntangu ya kuyonzika samu na nge, ntangu mu ke nata bampika ya bantu ya munu.*

<sup>23</sup> Mfumu Yesu, basisa na Yayi, na nzila ya Mpeve-Santu ya Nge, dibanza yina me lunga, na yina beto ke vingila dyaka na Nge. Na Nkumbu ya Yesu. Amen.

<sup>24</sup> Ntangu yayi, dilongi ya munu na suka yayi kele: *Kuzaba Kilumbu Ya Beno Mpe Nsangu Ya Yawu.*

Beto monaka na lesu ya Lumingu me luta, mutindu beto zonzilaka, na *Feti Ya Bampungu*. Mpe mu zola benda bukebi

ya beno, ntangu yayi, na ntangu—na ntangu ya Israel mutindu montele ya Nzambi.

<sup>25</sup> Beto ke baka bubu yayi leso ya lukolo ya Lumingu, ti mu zola beno bakula mpe kuzaba ntangu yina beto ke na kuzingila. Ntangu me kwenda beto ntama, mutindu beno lenda mona. Mpe na yina, na nzila ya yayi, beno fwana zaba ngunga ya kieleka mpe ntangu, mpe kidimbu mpe Nsangu yina beno ke kuzwa.

<sup>26</sup> Ntangu yayi, na yina beto bandaka Lumingu me luta . . . Beto vwandaka zonzila na kulonga na zulu ya Bampungi, Bampungi Sambwadi ya nsuka ya Biblia. Mpe munu, na munu mosi, mu banzaka ti ya ke bukana kaka mutindu Bidimbu. Kasi mu me tala na mosi na mosi ya kuzibuka yayi ya me vwanda na kima ya nene yina kusalamaka.

Mpe mutindu beto longaka *Bansungi Sambwadi ya Dibuundu*, mpe yawu vwandaka kieleka mingi tii Mpeve-Santu Yandi mosi kulumukaka na kati-kati ya beto mpe pesaka kimbangi ya yawu, mpe tulaka yawu na zulu ya mikanda, mpe losaka yawu na yinsi ya muvimba, mpe talisaka yawu na ngonda na mazulu, mpe siamisaka yawu na beto, balumingu mpe bangonda na ntwala yawu salama, ti ya ke vwanda kaka mutindu yina, na mutindu ya kulunga. Awa na tabernacle Yandi salaka yawu kuzabana. Awa na . . . na ntangu, Yandi salaka yawu kuzabana. Na ngonda mpe mwini, Yandi salaka yawu kuzabana. Mpe na kisika ya bayinsi na ntangu yayi, Yandi me sala yawu kuzabana; na yina bukimfumu ya Rome kukwendaka mpe vutukaka na Palestine, ba ke banza ti ya ke vwanda pape ya ntete tuka (ba ke tuba) Pierre vwandaka pape. Ntangu yayi, ya vwandaka ngitukulu mingi!

<sup>27</sup> Na manima, beto ke mona, na ntwala ya Bidimbu Sambwadi yina bumbaka mansweki nyonso.

Mu vwanda zaba ve yina mu vwandaka fikula na tablo, samu na Bansungi ya Dibuundu. Ata fyoti ve. Nzambi zabaka. Kaka na nzila ya vision, mu fikulaka yawu. Kukondwa kuzaba ti Nzambi, na mvula mosi mpe bangonda sambanu na ntwala, zolaka pesa kimbangi ya yawu na mazulu, na ngonda, mpe kulutisa yawu na bazulunale yinsi ya muvimba. Mu zabaka yawu ve. Mu zabaka ve ti ya ke vwanda na kukuma ya ndombe na mutindu ya ngitukulu ya ngonda, samu na kumonikisa Nsungi yayi ya Laodicée.

<sup>28</sup> Ntangu yayi, na bazulunale, beno ke kuzwa kaka bansungi sambanu. Ya kele samu ti dibuundu ya Laodicée vwandaka ya muvimba ndombe. Mpe kana beno tala nsalulu ya kimpeve, mutindu Nzambi tulaka yawu na mazulu. Ntangu mu tulaka yawu awa na zulu ya ntoto, mu bikaka mwa kitini ya kisika ya fyoti, mutindu beno monaka, kaka mwa kitini ya fyoti ya nsemo. Yina vwandaka kaka na ntwala Musolami ya kieleka kubokilama na ntoto, ya kele samu na yina mu tulaka yawu kuna na nsungi ya sambwadi. Kasi ntangu Nzambi tulaka yawu na

mazulu, ya vwandaka nyonso ndombe, ya lendaka zola kutuba ti muntu ya nsuka me bokilama na Nsungu ya Laodicée. Beto zaba ve. Ya lendaka vwanda dilongi na zulu ya yawu.

<sup>29</sup> Ntangu yayi beno tala dyaka, na ntwala ya Bidimbu Sambwadi, yina mu vwandaka na dibanza ve ya vwandaka mutindu yina.

Awa na tabernacle Yandi zonzilaka na yawu, mpe fidisaka munu na Tucson, na Arizona, na kutubaka na beno nyonso yina ke salama. Mpe ya kele na bantu ya kuvwanda awa, bubu yayi, bayina vwandaka kuna samu na kumona yawu kusalama kaka kieleka mutindu ba tubaka yawu awa yawu ke salama, “Bawanzio Sambwadi ke kwiza.” Na manina bazulunale bakaka yawu, mpe bamagazine, na kati ya yinsi, “Selekele ya Nsemo ya misitiki na mutindu ya pyramide,” kaka mutindu mu fikulaka yawu awa mpe mu talisaka beno. Yawu telamaka kisika Bawanzio yina vwandaka ya kutelama, mpe kwendaka zulu bakilometele makumi yiya na nana, mpe vwandaka nene bakilometele makumi yiya na tatu; to na zulu bakilometele makumi yiya na tatu, mpe bakilometele makumi yiya na nana ya nene, mu me zimbana yina ya vwandaka. Mpe ba monaka yawu bisika nyonso na ba-eta, kuna kaka na zulu ya Tucson, na Arizona, kaka kisika ya salamaka, na ntangu mosi.

<sup>30</sup> Beno me mona, Biblia, Nzambi kele kaka ve . . . Yayi kele kaka ve muntu ke na kumeka na ku—kusala ngolo na kima mosi na zulu ya beno, kasi samu na kumonisa na beno nsalulu ya kieleka ya kimpeve ya ngunga yayi.

<sup>31</sup> Mpe na manina, Nsangu yina landaka, zibulaka Bidimbu Sambwadi, na zila ya yina kuzibulaka mansweki nyonso ya kubumbama ya Biblia, Malongi, mpe nyonso yina. Na yina, yinza ke nwanisa na mutindu ya ngolo mingi na bilumbu yayi, ke nwanisa Yawu mpe ke tuba ti Yawu ke luvunu, *yayi, yina*.

<sup>32</sup> Awa kilumbu yankaka yina na Arizona, ba vwandaka zenga mpe kuvukisa bitini ya ba-bande, samu na kumeka na kusala munu kutuba bima yina mu tubaka ve. Beno bambuka kaka moyo na vision na zulu ya dibanza ya Arizona! Biblia me tuba, “Ya vwandaka mbote mingi samu na beno ti beno vwandaka na ditadi na laka ya beno.” Mpe kima yankaka, ti, “Muntu nyonso,” ti yandi vwanda mulongi to yina yandi zola, “ke katula Ndinga mosi na Yawu, to ke bwela ndinga mosi na Yawu!” Bantu ke na kutulaka ntendulu ya bawu mosi na zulu ya Ndinga mutindu Yawu kupesamaka, na kumekaka na kusala Yawu kutuba kima yina mu tubaka ve, mpe, Ndinga ya munu ve; Yawu kele Ndinga ya Yandi. “Muntu ke bwela, to ke katula!”

<sup>33</sup> Mpe na yina, na vision, beto monaka na nswalu kukulumuka baprofete yayi, mutindu mu bangulaka na beno, mu banza, Balumingu mingi me luta. Nyonso ke salama. Mu tubaka, “Benoni vwanda kaka ntama ya yawu.” Ntangu nyonso mu ke nwanisa



yawu, kuna Nzambi lenda nwanisa yawu ve. Kasi beto bika Yandi kuzwa yawu. Yandi kele Yandi Yina ke keba na yawu. Beno me mona?

<sup>34</sup> Ntangu yayi beto talaka, Lumingu me luta, ya vwandaka . . . beto longilaka na bilumbu ya feti. Mpe ya vwandaka na feti ya pentecote. Mpe na kati-kati ya feti ya pentecote mpe feti ya bampungu, ya vwandaka na ntangu mosi ya yinda; ya kieleka bilumbu makumi tanu na kati-kati ya pentecote mpe feti ya bampungu. Mpe bilumbu makumi tanu, mpe, *pentecote* zola kutuba “makumi tanu.” Ya vwandaka kuningisa ya kita ya matiti, to kuyon- . . . Ba vwananda kotisa bambuma ya ntete ya kuyonzika. Mpe beto ke mona ti ya vwandaka kifwanukusu na manima kuna, na bambuma ya ntete ya yinza, yina ke monikisa bambuma ya ntete ya Mpeve-Santu yina ba ke mwangisa na zulu ya bantu.

Mpe beto monaka, kuna, ti bilumbu makumi tanu yina kuyambamaka na Bantu ya makanda, na yina, “Nzambi bokilaka na Bantu ya makanda bantu samu na Nkumbu ya Yandi,” feti ya pentecote. Mpe beto lutilaka na feti yina ya yinda ya pentecote.

<sup>35</sup> Awa, ntangu yayi, bilumbu makumi tanu, ke vwanda kieleka basaba sambwadi. Mpe basaba sambwadi monisaka Bansungi Sambwadi ya Dibuundu, samu ba bokila na ntangu ya feti ya pentecote, ya Pentecote, kubokila bantu na Bantu ya makanda samu na Nkumbu ya Yandi.

Ntangu yayi, na nsuka ya basaba sambwadi yayi, yina vwandaka, ya zolaka vwanda Kilumbu ya Kukatula-masumu, yina vwandaka Bampungu Sambwadi. Mpe Bampungu Sambwadi zolaka bokila kilumbu ya kunyonga, kuvutuka na Munkayulu, to, Kukatula-masumu. Mpe beto talaka kuna, ti, Israel, Bampungu Sambwadi vwananda tadila kaka Israel.

<sup>36</sup> Mpe, kuna, ya kele samu na yina Yandi pesaka ve munu muswa ya kulonga Bampungu Sambwadi yayi. Mu vwandaka yimeni ya kukubama na kusamuna yawu, bivinga vwananda ya kuyilama mpe nyonso samu beto kwenda, na kulonga Bampungu Sambwadi. Mpe mu tubaka, “Ya ke na kima ke na kukwamisaka munu yimbi mingi,” mu tubaka. Beto landilaka na kusala, mpe Billy na beto nyonso, vwanda meka na kukubika nyonso samu na klime ya kivinga, samu na lumingu vwananda kwiza, samu na Bampungu Sambwadi; beto kuzwaka bilumbu kumi, to nana, ya kivinga ya lukolo. Kasi Mpeve-Santu pesaka munu muswa ya kusala yawu ve, samu na kikuma mosi, mpe mu kukiyufulaka samu na yinki.

Mpe na ntangu mu kwendaka na kusambila, mu tubaka na kento ya munu, “Mu ke kota na kisambu.” Mpe ya kieleka mu fukamaka na ntuala ya Nzambi, samu na kusambila. Mpe Yandi monikisaka na munu ti Bampungu Sambwadi yina kuwakanaka

na yisi ya Kidimbu ya Sambanu, mpe ti mu longaka yawu, na mutindu ya kimpeve. Beno me mona, ya kele diboko ya Nzambi, kima ya muvimba. Ya me tadila Israel, mpe beto bakaka yawu na yisi ya Kidimbu ya Sambanu; beno nyonso yina kele na yawu, ya kele nkwasusu ya ba-Juif.

<sup>37</sup> Ntangu ya Bantu ya makanda me vwanda na feti ya pentecote yayi.

Bampungu, na yisi . . . nyonso ya yawu kuwakanaka na yisi ya Kidimbu ya Sambanu. Mpe beto bakaka yawu Lumingu me luta, na yisi ya feti ya bampungu, kana beno nyonso zola kuzwa yawu. Yinki ya zolaka sala? Kunata na nswalu ba-Juif, bisika nyonso na yinza, na kuvutuka na yinsi ya bawu. Ya fwana vwanda kuna. Mpe kuzibuka ya Bidimbu, na yisi ya Kidimbu ya Sambanu, mpe na yisi . . . Bampungu Sambwadi kuwakanaka na Kidimbu ya Sambanu.

<sup>38</sup> Ntangu yayi, Nsangu ya wanzio ya sambwadi kele samu na kuzibula dinsweki ya Bidimbu, na kubokilaka bisadi ya Bantu ya makanda ya ngunga ya kumi na mosi na kuzwa difuta mosi mutindu bisadi ya ngunga ya ntete kuzwaka. Beno me mona?

Ntangu yayi, Yesu tubaka yawu. Yandi tubaka ti ya vwandaka na mwa bantu kwendaka na kuyonzika. Ba bakaka bawu na kisalu. Mpe bawu bandaka na kusala, na suka-suka, bawu zolaka kuzwa, pata mosi samu na kilumbu ya muvimba. Mpe kuna na midi, muntu yankaka kwizaka mpe kotaka na kisalu. Mpe kuna na ngunga ya kumi na mosi, yina kele ngunga ya nsuka ya kilumbu, ti muntu mosi kwizaka mpe kuzwaka mutindu mosi ya difuta yina bawu salaka na ngunga ya ntete ya kilumbu; ngunga ya nsuka.

<sup>39</sup> Ya kele ya kulunga mingi, mutindu minati-nsangu ya ngunga ya ntete na Ndinga, na Nsangu ya mbote, na Kieleka, bawu kwizaka na Kilumbu ya Pentecote. Na manina ya vwandaka na nsungi ya mpimpa yina kangaka bawu. Na yina na kati-kati ya kilumbu, Luther, mpe Wesley, mpe bayankaka, kwizaka. Mpe na yina ya kele na Nsangu ya ntangu ya nkokila, mpe ke kuzwa kima mutindu mosi yina bawu kuzwaka na mbandukulu. Nsangu ya ntangu ya nkokila kele samu na kuvutula dyaka, kuvutula dyaka kima yina.

<sup>40</sup> Mpe beno bambuka moyo na vision ya lumingu me luta, ti ntangu Kento ya makwela kwizaka samu na . . . kumonana ya ntuala ya yawu. Kuna kwizaka ntwenya ya Kento ya makwela, ya luzolo, na vision. Mpe munu, mu vwandaka banza ve na yawu; mu vwandaka kaka ya kuvwanda kuna na ngaanda vwandaka tala mbote. Mpe kuna kwizaka Kento ya makwela. Mu kuwaka Ndinga na lweka ya munu, tubaka, "Awa kele kumonana ya ntuala ya Kento ya makwela." Mpe Yandi lutaka kuna. Mu monaka Yandi, mutindu Yandi vwandaka, ya luzolo mingi, ya kitoko, ntwenya. Yandi vwandaka tambula kaka mbote mutindu

ya Yandi lendaka, vwanda tambula ve mutindu basoda; kaka na mutindu ya kutambula ya yinda ya kento, mutindu bawu ke tambulaka na buzitu nyonso, na mutindu ya bumama. Ya kele mutindu Yandi vwandaka tambula, na kukwizaka na lweka ya munu ya kikento *yayi*, mpe Yandi basikaka na ntwala ya munu.

<sup>41</sup> Na manina Yandi balukaka munu na lweka ya kibakala, mpe Yandi talisaka munu konso dibuundu mutindu bawu basikaka na bansungi. Mpe, oh, mutindu ya vwandaka yimbi mingi! Mpe ya nsuka vwandaka nsungi ya dibuundu ya kilumbu ya nsuka yayi, yina vwandaka ya kutwadisa na ndoki ya kento. Mpe bawu vwandaka ya kulwata na mutindu ya kukondwa buzitu mingi, ya kulutula yimbi! Mpe bawu vwandaka kwenda na ritme ya twist mpe rock-and-roll. Mpe bakento yina vwandaka losama bawu mosi kaka mutindu na ba-twist, bawu vwandaka kaka ya kusimba mukanda, ya gris, luvunu, mu- . . . Gris kele na kati-kati ya mpembe mpe ndombe, yina kele ntinta ya luvunu. Gris kele ve mpembe to ndombe. Ya kele ntinta ya luvunu. Mpe mukanda ya kotalana gris, ya kusimba na ntwala ya bawu, na bazupe ya hula mutindu dentelle vwandaka ya kusimba na ntwala ya bawu, mpe ya muvimba kinkonga tii na luketo. Mpe vwandaka tambula na . . . to na ritme, to na kuningisaka nzutu nyonso, mpe landilaka na muziki yina, na kutambulaka. Mpe yandi tubaka, “Yina kele dibuundu.”

<sup>42</sup> Mpe na ntangu yawu lutaka na lweka ya munu, ntima ya munu zolaka kubwa ngambu. Mu banzaka, “Kana ya kele yina ke na kumekama na kumonikisa Klisto, mutindu Kento ya makwela? Na bangolo nyonso mpe bima yina bantu me sala, samu na kumeka kusala Kento ya makwela samu na Klisto; mpe ndumba ya yimbi, ya mvindu, ya kotalana yimbi mingi mutindu yina ke vwanda Kento ya makwela ya Klisto?” Ya salaka munu kubela na ntima ya munu.

<sup>43</sup> Mpe na yina yandi lutaka, na manima ya yandi . . . Na kukwizaka na ntwala kisika beto vwandaka ya kutelama, yandi vwandaka simba mukanda na ntwala ya yandi, vwandaka sala twist, mpe vwandaka baluka, mpe vwandaka ningisa yandi mosi na lweka mosi mpe dyaka na lweka yankaka, na yina yandi vwandaka kwenda, mutindu makinu ya bilumbu yayi ba ke na yawu na kilumbu yayi, vwandaka sadila yandi mosi na kisalu ya kukondwa buzitu na yina yandi vwandaka landila na kutambula.

<sup>44</sup> Mu kele ve na kizitu ya bima yayi. Mu lenda tuba kaka yina mu monaka. Mpe Nzambi Zuzi ya munu, kasi yina vwandaka dibuundu ya U.S.A.

<sup>45</sup> Ntangu yayi, na yina yandi vwandaka luta, kitini nyonso ya manima vwandaka mwasi. Mpe na yina yandi lutaka, mu kumaka ya kulemba mpe ya kubela.

<sup>46</sup> Na manina Yandi tubaka, “Kento ya makwela ke kwiza na kumonana ya ntwala dyaka.” Mpe awa Kento ya makwela kwizaka na manima ya yandi, Kento ya makwela na kutalana kaka mosi na yina lutaka na mbandukulu. Kuna ntima ya munu dumukaka na kyese, na kuzabaka ti ya ke vwanda na Kento ya makwela. Mpe Yandi ke vwanda ya kusala na mutindu mosi, mpe ya kulwata na mutindu mosi, na Yandi yina vwandaka na mbandukulu. Ba ke bokila Yandi.

Mpe mu zaba ti ya kele Kieleka. Kana ya kele kieleka ve, na yina vision nyonso yina mu me kuzwa na manima kele luvunu. Mpe muntu nyonso zaba, ti, kima mosi ve Yandi me tubaka ntete na beto kasi yina vwandaka Kieleka. Ya salamaka, kaka . . .

<sup>47</sup> Mpe beno lenda mona, na yina, bumvindu ya dibuundu ya bilumbu yayi, ke bokila yandi mosi “dibuundu”?

<sup>48</sup> Mutindu muntu tubaka kilumbu yankaka yina; Mpangi Ruddell, mpangi ya munu ya ntalu, yina me telama kuna na kibaka ntangu yayi. Ti, yandi monaka yawu mutindu nsimbulu na vinu. Mpe beto vwandaka zonzila yawu na kati ya kivinga kilumbu yankaka yina. Mpe Mpangi Ruddell vwandaka ya kukwamisa na bakondisyo ya ntangu mpe—mpe na nsatu ya mpeve na kati ya mabuundu bubu yayi, mutindu yawu me banda na kubwa. Milongi ke katuka bisika nyonso, mpe na masolo awa, ke yufula, “Yinki me salama, Mpangi Branham? Yinki me salama?” Oh, la la!

<sup>49</sup> Mpangi Ruddell yufulaka munu kyuvu, “Bawu ke na kuzingaka na mpeve ya Satana, to yinki?”

<sup>50</sup> Mu tubaka, “Ve, nsimbulu ke na kuzinga na ngolo ya vinu.” Ya ke na kuzingaka samu ti, mbuma ya agrume, dilala ya ngayi ke mena na yinti ya malala; kasi ya ke buta ve malala, ata ti ya ke zinga na nzila ya luzingu ya yawu.

Mpe dibuundu, ya nkumbu, kele kaka nsimbulu ba me namika, yina ke na kuzinga na yisi ya nkumbu ya nsambulu, na yisi ya nkumbu ya dibuundu. Katolika mpe Protestant, kele kaka bansimbulu, yina ke na kubendaka . . . na ngolo ya Vinu; mpe dyaka ke pesa mbuma ya yina yawu kele, samu ti bawu ndimaka ve. Bawu vwandaka ve na dikani ya ntete, yina Nzambi zabaka na ntwala, ya kele samu na yina bawu fwana manga Ndinga mpe kubuta mutindu yankaka ya mbuma. Yinti ya kieleka, na kati ya nsimbulu ya yawu, vwandaka ya kuzaba na ntwala na kubuta malala na yinti ya malala.

Yesu tubaka, “Mu kele Vinu; beno kele bintala.”

<sup>51</sup> Kasi kana yinti yina kubuta kintala yankaka, ya ke buta mbuma ya yawu ya ntete. Mpe ya fwana vwanda na kuvutula ya bima nyonso yayi, kaka na nsuka ya Vinu. Ya fwana vwanda, kukwiza, kuvutula, Nsemo ya nkokila samu na kupesa Yawu nsemo mpe kusala Yawu kukula. Kasi ya ke basika na Vinu, ve na denomination yina ba namikaka na Yawu; kasi mbutukulu ya

ntete ya Ndinga. Ya ke kwiza na ntangu ya nkokila. “Mpe ya ke vwanda na Nsemo na ntangu ya nkokila.” Ya ke lomba Nsemo na kuyelisa Yawu.

<sup>52</sup> Beno mona mutindu ya kulunga kele Masonuku! “Kilumbu yina ba ke bokila ve kilumbu to mpimpa.” Mbuma lenda ve kuyela kana mwini kuyelisa yawu. Ata bambala yikwa beno ke longa, nyonso yina beno ke sala, ya lenda ve kuyela, ya lenda ve kumonisama, ya lenda siamisama ve; kaka na nzila ya Yandi Yina tubaka, “Mu kele Nsemo ya yinza,” Ndinga. Na yawu ya fwana basika Ngolo, Mpeve-Santu Yandi mosi, samu na kuyelisa, to samu na kusiamisa, to samu na kupesa kimbangi, to samu na kulakisa ti yina Yandi tubaka na ntuala ke salama na kilumbu yayi. Nsemo ya nkokila ke basisa yawu. Wapi ntangu!

<sup>53</sup> Kento ya makwela lutaka na kisika mosi yina Yandi vwandaka ntangu Yandi vwandaka na mbandukulu. Kasi mu monaka Yandi kubasika na kutambula, mpe mu vwanda meka na kubenda Yandi na kuvutuka. Ntangu yayi, bima mingi lendaka tubama na zulu ya bima yayi, ya kilumbu yina beto ke na kuzingila.

<sup>54</sup> Ntangu yayi, Osée tubaka, na 6:1, “Beno vutuka na Mfumu.” Beno bambuka moyo, yandi tubaka ti ba ke mwangisa bawu, mpe ba mwangisaka bawu. Yandi tubaka, “Ba ke vutuka na Mfumu, na manima ba me mwangisa bawu, mpe Yandi ke, ke kanga bamputa ya bawu.” Beno tala, “Beno vutuka . . . Kumwangana; ya zole. . . Ba pasulaka bawu, mpe kumaka mpofu.” Ya kele kaka kieleka yina salamaka. “Yandi ke belusa beto, mpe ke kanga bamputa ya beto.”

Mutindu Ezéchiel 37, “Mikwa ya kuyuma, kiwanda ya kufuluka na mikwa ya kuyuma.” Ezéchiel monaka yawu, kuvutuka ya bawu dyaka.

Na yina beno tala, Osée tubaka, “Na manima ya bilumbu zole!” Na manima ya bilumbu zole Yandi ke vutuka na bawu. “Yandi ke yamba beto mpe ke pesa beto, kuzinga dyaka.” Ntangu yayi, *kuzinga dyaka* zola ve kutuba “mvumbukulu.” *Kuzinga dyaka*, kuna, ya kele mpova mosi yina ba ke sadila kisika nyonso yankaka, mu vwanda me tala kaka yawu, ya zola kutuba, “reveil.” “Yandi ke sala beto kuzinga dyaka na manima ya bilumbu zole.” Ya ke vwanda, “Na kilumbu ya tatu Yandi ke sala beto kuzinga dyaka, na manima Yandi me mwangisa beto, mpe me kufwa beto meso, mpe me pasula beto.”

<sup>55</sup> Beno zaba, ba-Juif vwandaka ya kufwa meso samu na lukanu ya kieleka samu ti beto mona. Ba pasulaka bawu, mpe vwandaka ya kumwangana, mutindu yinsi, mpe bawu losaka Mesiya ya bawu; samu ti beto lenda kuzwa Mesiya, ti ya lendaka vwanda na bantu yina ba me bokila na kubasika na Bantu ya makanda samu na mbote ya Nkumbu ya Yandi.

<sup>56</sup> Ntangu yayi, bakala ke basika, mpe kento ke baka nkumbu ya yandi. Bantu ya makanda ya kufwa meso yayi yina lendaka kumona ve Nkumbu yina, “Mfumu Yesu Klisto,” na mbotika! Ya kele kaka yimbi mingi, kasi ya fwana vwanda mutindu yina. Ba-Juif, ba zolaka—ba zolaka mona yawu ve. Ya kele kaka na mosi yina lenda mona yawu; ya kele yandi yina ba soolaka ntete na kumona yawu. Kana ve, beno ke mona yawu ata mbala mosi ve.

Ba-Juif lendaka ve na kumona ti yina vwandaka Mesiya ya bawu. Mpe, dyaka, bawu vwandaka bizabi mpe bantu ya théologie, bantu ya mayela mingi ya kuzabana, yina tangaka Biblia mosi yina beno ke tangaka. Ntangu yayi, na manima yawu me zabana na beto, beto lenda mona yawu pwelele, ti yina vwandaka Mesiya. Kasi, bawu lendaka ve na kumona yawu, mutindu mosi bawu lenda mona yawu ve bubu yayi. Ba pesilaka bawu profesu na kuvwanda ya kufwa meso, mpe.

<sup>57</sup> Ba pesilaka dibuundu, ya bubu yayi, profesu ya kuvwanda ya kufwa meso, na kumanga Nsangu ya ntangu ya nkokila. Apocalypse 3 me tuba mutindu yina, “Nge kele muntu ya mawa, ya mpasi,” beno tala kondisyo ya kento ya makwela na nkokila yankaka yina, to ya dibuundu, “kinkonga, mpofo, mpe zaba yawu ve.” Mfumu Yesu, tala beto kyadi! Biblia ke tuba ti yandi vwandaka “kinkonga.” Mu monaka yawu ve ntete tii kaka ntangu yayi. Dibundu ya Laodicée vwandaka kinkonga. Mpe ntangu yandi basikaka nkokila yankaka yina, yandi vwandaka “kinkonga,” mu talaka yawu ata fyoti ve, “mpe zabaka yawu ve.”

<sup>58</sup> Oh, mutindu mu ke vutula matondo! Wapi mutindu, kuyituka ve ti beto ke vutula matondo mingi! Mu ke tala ti beto ke vutula matondo mingi ve samu na bima yina Nzambi ke sala beto kuzaba.

<sup>59</sup> “Kinkonga.” Mpe ba-vision vwandaka tuba, vwandaka lakisa munu ti yandi vwandaka kinkonga mpe zabaka yawu ve, mpe “ya kufwa meso.” Mutindu Israel vwandaka ya kufwa meso samu ti Bantu ya makanda kukota, ntangu yayi Bantu ya makanda kele ya kufwa meso samu ba baka Kento ya makwela mpe Israël kuzwa feti ya Bampungi. Kaka na mutindu ya kulunga!

<sup>60</sup> “Na manima ya bilumbu zole Yandi ke sala beto kuzinga dyaka, to kupesa beto réveil, na kunataka beto kintwadi, ba-Juif,” na kuzonzilaka na Bampungi yayi ntangu yayi. Mpe Yandi ke . . . “Mpe beto ke zinga na ntwala ya Yandi, to kuzwa Luzingu ya Seko. Beno me mona, beto ke vwanda na ntwala ya Yandi.” Biblia me tuba awa na Osée, ya me tuba, “Mpe beto ke zinga na ntwala ya Yandi; Luzingu, kuzwa Luzingu na ntwala ya Yandi.” Yina kele Luzingu ya Yandi Mosi, Luzingu ya Seko, “kuzwa Luzingu na ntwala ya Yandi.”

“Yandi yina ke zinga na kyese kele ya kufwa na yina yandi kele moyo.” Na yawu beto . . . silaka ti Israel ke vwanda dyaka na Luzingu na ntwala ya Yandi. Yandi kufwaka, na mambu, mpe na feti ya pentecote.

<sup>61</sup> Ntangu yayi beno tala, mbote-mbote. “Kuna na manima ya bilumbu zole.” Ntangu yayi, yina zola kutuba ve ti bilumbu zole ya makumi zole na yiya ya ngunga, samu ti ya vwandaka . . . Yina salamaka ntama kuna, bankama mingi ya bamvula me luta. Beno me mona? Ya zola kutuba, “bilumbu zole na Mfumu,” na manima ya bamvula mafunda zole. Ntangu yayi, beno zaba bantangu yikwa ya me vwanda kubanda ntangu yina? Ya me vwanda bamvula makumi zole na sambwadi tuka yina, samu ti na Osée awa ya kele na mvula 780 na ntwala ya Yesu Klisto. Mvula 1964, beno me mona, ya vwandaka kima mosi na zulu ya bamvula bankama makumi zole na sambwadi me luta. Yandi tubaka, “Na manima ya bilumbu zole, na kilumbu ya tatu, Yandi ke sala beto kuzinga dyaka, mpe kupesa beto Luzingu na ntwala ya Yandi.” Beno tala Bampungi ya beno kukota. Ya kele ngunga yina beto ke na kuzingaka, kilumbu yina beto ke na kuzingilaka.

<sup>62</sup> Ntangu yayi, ba mwangisaka bawu, ya kufwa meso, vukanaka, mpe kele ntama na kilumbu ya tatu. Beno me mona yawu? Ba mwangisaka bawu, katuka Palestine, na yinza ya muvimba. Ba vwandaka ya kufwa meso, na kumanga Mesiya. Mpe ntangu yayi ba me vukisa bawu na yinsi ya bawu, ba me kubama samu na Bampungi, samu na kuzaba Kukatula-masumu.

Mutindu Biblia ke tuba, “Ntangu bawu ke kuzwa Yawu, mpe ke tala Yandi na bidimbu ya banonso,” na manima Dibundu me bakama, “mpe bawu ke tuba, ‘Wapi kisika Nge me kuzwa bidimbu yayi?’ Yandi tubaka, ‘Na yinzo ya bankundi ya Munu.’” Mpe Yandi tubaka, “Bawu ke kabwana, konso dibuta, mpe ke dila mpe ke dila, bilumbu, mutindu dibuta yina me zimbisa mwana ya bawu mosi kaka.” Beno bambuka moyo, feti yina ya Bampungi zolaka sala yawu. “Kudila, kunyonga samu na Munkayulu yina ba kufwaka,” mpe bawu mangaka Yawu.

<sup>63</sup> Ba kele na yinsi ya bawu. Ba mwangisaka bawu, ya kufwa meso, mpe ntangu yayi ya kuvukana. Mpe ya vwandaka nyonso na yisi ya Kidimbu yina ya Sambanu, Bampungi Sambwadi ya bawu . . . ya wakanaka samu na kuvukisa yawu, Mpungi ya Sambanu. Ya Sambwadi kele “Mpungi yina ya Nene,” mutindu beto talaka Lumingu me luta. Mpungi ya Sambanu kuwakanaka na yisi ya Kidimbu ya Sambanu. Kaka mutindu Kidimbu ya beto ya Sambanu kuzibukaka, nyonso na ntangu mosi; kaka, nyonso ya bawu kuwakanaka na mbala mosi; kisika, beto vwandaka bamvula mafunda zole na feti ya pentecote.

<sup>64</sup> Ntangu yayi, bamvula bankama makumi zole na sambwadi kubanda ntangu yina. Yandi tubaka, “Na kilumbu ya tatu, beto

ke vukana dyaka. Na manima ya bilumbu zole, na kilumbu ya tatu, beto ke vukana dyaka, mpe ke kuzwa Luzingu na ntwala ya Yandi.” Beno ke mona nsilulu? Ngunga me sonama na mutindu ya kulunga na kibaka. Beto ke mona kisika beto ke na kuzingila.

<sup>65</sup> Ntangu yayi kele na yinsi, ke na kuingilaka na Feti ya Bampungu, to na kuzaba Kukatula-masumu, mpe ke na kuingilaka Nkwizulu, samu na kunyonga kumanga ya bawu ya mbala ya ntete ntangu bawu mangaka Yandi. Ba kele na yinsi ya bawu samu na yawu, na kuingila. Yinki bawu nyonso kele. . . Bima nyonso me tulama na kisika.

<sup>66</sup> Mutindu mulongi ya Nsangu ya mbote, mu lenda ve kumona kima mosi yina me bikana kasi kaka kukwenda ya Kento ya makwela. Mpe ba fwana baka ntete Kento ya makwela na ntwala bawu zaba yina salamaka. Ba vwandaka ya kukanga, ya kumwangana. . . Mu zola tuba, ba vwandaka ya kumwangana, ya kufwa meso, mpe ntangu yayi ya kuvukana. Yinki me bikana? Ba katula Kento ya makwela na nzila. Ke na kuingila kukwenda ya Kento ya makwela, samu baprofete ya bawu ya Apocalypse 11 kubokila bawu na feti ya Mpungi, kusala bawu kuzaba yina bawu salaka.

<sup>67</sup> Beno bambuka moyo, kaka na kati-kati ya Bidimbu yina, kwizaka Kidimbu ya Sambanu. Mpe ya vwandaka na nkama mpe makumi yiya na yiya ya mafunda, yina ba soolaka mpe ba bokilaka. Mpe na kati-kati ya Mpungi ya Sambanu mpe ya Sambwadi, Apocalypse 11 ke monana kaka kuna kieleka na nzila na Kidimbu ya Sambanu.

<sup>68</sup> Samu na kusala yinki? Yinki ya zolaka sala? Mpe yayi zolaka nata bambangi zole, Moïse na Élie, baprofete. Mpe, ba-Juif ke kwikilaka kaka na baprofete ya bawu. Mpe bawu ke kwiza na kidimbu ya baprofete, mpe kisalu ya bawu ke vwanda yina ya profete, samu ti bawu ke sala mutindu ya kieleka.

Na kulakisaka kima mosi, ti, muntu, ntangu yandi ke kufwaka to nyonso yina, ntangu beno ke katuka yinza yayi, nkadulu ya beno ke soba ve. Kana beno kele muntu ya luvunu ntangu yayi, beno ke vwanda muntu ya luvunu kuna. Kana beno ke dasukaka na mbangu awa, beno ke dasuka na mbangu kuna. Kana beno kele muntu ya ntembe awa, beno ke vwanda muntu ya ntembe kuna. Babakala mpe bakento, ya kele ntangu ya kuningisa beno mosi mpe kukitala beno mosi, mpe kumona kisika beto kele ya kutelama, samu ti lufwa ke sobisaka yawu ve.

<sup>69</sup> Bawu kwendaka bamvula mafunda zole. Moïse bamvula pene ya makumi zole na tanu ya mafunda, mpe Elie kubanda ntama. . . Na kutala bamvula makumi zole na tanu ya mafunda ti Elie kwendaka, mpe Moïse kwendaka, mpe awa bawu ke vutuka na nkadulu mosi mpe ke sala bima mutindu mosi.

Lufwa ke salaka kima mosi ve na muntu kasi kusoba kisika ya yandi ya kuzinga. Ya sobisa ve nkadulu ya beno. Ke sobisa ve



lukwikilu ya beno. Ke sobisa kima mosi ve na kati ya beno kasi kisika ya beno ya kuzinga.

<sup>70</sup> Na yawu, ata mutindu nkadulu ya beno kele na suka yayi! Kana beno kele muntu ya ntembe ya Ndinga ya Nzambi, beno ke vwanda muntu ya ntembe kuna. Mu ke kipe ve mutindu beno kele santu, mutindu beno ke zinga, mpe mutindu mbote beno ke zinga, ya ke sobisa ve beno ata fyoti na lufwa, kaka kisika ya beno ya kuzinga. Mpe kana beno lenda ve kundima Ndinga ya muvimba ya Nzambi mutindu Yawu kele ya kusonama, beno ke sala yawu ve Kuna; na yawu, beno vwanda na boma ve, beno ke vwanda ve Kuna.

Beno fwana ndima Yawu na muvimba ya Yawu, na ngolo ya Yawu ya kimbangi mpe luzayikisu ya yina Yawu kele, kuna beno ke kuma kitini ya Yawu. Ya kele kaka Ndinga ya Yandi yina Yandi ke vumbula, mutindu Yandi salaka Ndinga ya Yandi na suka ya ntete ya Paki. Kaka Ndinga ya Yandi basikaka, mpe bayina kufwaka na Ndinga ya Yandi, na kukwikilaka Ndinga ya Yandi mpe siamisaka Ndinga ya Yandi.

<sup>71</sup> Beno tala, ntangu yayi, yina vwandaka makumi zole na sambwadi ya bamvula me luta. Beno tala, ba vwandaka ya kumwangana, ba vwandaka ya kufwa meso, mpe ntangu yayi ba me vukisa bawu. Ntangu yayi, kima yina ke landa kele ti bawu fwana kuzwa Luzingu.

<sup>72</sup> Mpe Bantu ya makanda me bokilma na kubasika. Kento ya makwela me kubama. Enlevement me kuma pene-pene. Beto lenda bakula yawu? Beto lenda kieleka kukwikila yawu? Ya kele disolo yina ba zonzaka? Ya kele luvunu, samu na beto? Ya kele kima yina ke wakana kieleka? Ya kele kima yina beto, na ngaanda, lenda kwikila? To, ya kele kima yina kele na kati ya beto, yina kele kitini ya beto, ti ya kele mingi kulutila luzingu samu na beto? Wapi mutindu ya nkadulu beto ke baka, na suka yayi, na tabernacle yayi? Beno bambuka moyo, ya ke vwanda mameme ya fyoti yina ke yamba Yawu.

<sup>73</sup> Ntangu yayi kele na yinsi, ke na kuingilaka Bampungu. Ntangu yayi ke na kuingilaka kukwenda ntwenya ya Kento ya makwela, samu Apocalypse 11 kulungisama. Nsungi ya dibuundu me suka; Bidimbu me zibuka, yina ke lakisa yina bawu bikaka na nsungi ya dibuundu, mpe Nsangu me pesama. Israel me kota na kusalu, alleluya, me kubama samu na Feti ya Bampungu.

<sup>74</sup> Oh, beno bantu na bayinsi yankaka kisika beno ke kuwa bande yayi, beno lenda ve kuvumbuka, mpangi ya munu? To, Yawu ke kufwa beno meso? Beno ke losa Yawu na ngaanda mpe ke bokila Yawu profesi ya luvunu? Na yina, Yawu me siamisama kaka na ntwala ya beno, na yinza, na ntangu, na nzila ya bantu, mpe na nzila ya Mpeve-Santu Yina sonikaka Yawu. Yawu me siamisama, na mutindu nyonso zole ya yinza, na mutindu ya

kimpeve, na mutindu ya bima. Nyonso yina Yandi tubaka me salama mpe me talisama.

<sup>75</sup> Israel na yinsi ya yandi; ba kotisaka bawu na ngolo kuna, nataka bawu kuna, mutindu mameme. Bayingo landaka yandi mpe vutulaka bawu na lukengolo, na yinsi ya bawu mosi. Beno bambuka moyo, ba silaka na Israel na kuvwanda ya kusakumuka ntangu nyonso yandi ke vwanda na yinsi ya yandi. Nzambi ata mbala mosi ve sakumuna Israel na ngaanda ya yinsi. Abraham kwendaka na ngaanda ya yinsi, ba fundisaka yandi. Muntu nyonso yina ke bika yinsi ke fundisama. Nzambi lenda kaka kusakumuna Israel ntangu yandi kele na yinsi ya yandi, mpe yandi kele kuna ntangu yayi mutindu yinsi. Mpe ba me bokila Dibundu; yandi ke na kvingilaka kaka na Enlevement, ya Kento ya makwela yina ba me basisa.

<sup>76</sup> Bidimbu kele pwelele. Ya kele ya kumonikisa na beto. Beto ke mona yina bawu bikaka. Beno bayina ke zolaka kuswana mpe kuzonza mambu na zulu ya nkuna ya nyoka, mpe mbotika ya maza, nyonso yina, beno kele ya kufwa meso mpe zaba yawu ve. Nzambi ya yinza yayi me kufwa beno meso, na Yawu, mpe beno zaba yawu ve. Ya kele samu na yina kukondwa ntembe ti mu kuzwaka ntangu mosi ya mpasi na suka yayi, na kuteleminaka kuyala nyonso yayi!

<sup>77</sup> Samu baprofete ya bawu kumonana na kilumbu yayi ya nsuka; beto lenda sala yawu ve, na nzila ya Bampungu, ya... na nzila ya Feti ya Bampungu.

<sup>78</sup> Yandi tubaka, na nzila ya Osée, “Mu me bula bawu.” Ntangu yayi beno tala mbote, Yandi ke na kuzonzaka na Israël. “Mu me bula bawu,” to na bandinga yankaka, “Mu me zenga bawu, mu me zenga bawu, na nzila ya baprofete.” Ya kele mutindu Nzambi ke salaka bantu ya Yandi. Yandi ke zenga na kukatula bawu na bayinsi yankaka. Na nzila ya yinki? Mbele ya Yandi ya meno zole, Ndinga ya Yandi. Yandi zengaka bawu, yinsi ya Yandi, na bayinsi. Yandi zengaka yinsi ya Yandi na bayinsi, na nzila ya baprofete, Ndinga ya Yandi yina me siamisama.

Mutindu mosi Yandi me zenga Kento ya Yandi ya makwela na ba-denomination, na nzila ya Ndinga ya Yandi; nsilulu ya Malachie 4, na kilumbu ya nsuka. Yandi zengaka na kukatula Kento ya Yandi ya makwela, me zenga Yandi na mabuundu yankaka! Me zenga na kubasisa Kento ya Yandi ya makwela!

<sup>79</sup> Yandi me zenga na kubasisa, baprofete ya Yandi; na nzila, na baprofete ya Yandi, na nzila ya Ndinga me zenga Israel. “Kabwana nge mosi na bayankaka ya bawu.”

Beno tala ntangu bawu zolaka kusala mutindu bayankaka ya bawu. Bawu kwizaka na profete, Samuel. Yandi tubaka, “Mu me bakaka ntete mbongo ya beno? Mu me tubaka na beno ntete kima mosi, na Nkumbu ya Mfumu, kasi yina salamaka?”

Bawu tubaka, “Ve, ya kele, ya kele kieleka, kasi beto zola kaka ntinu.”

<sup>80</sup> Ya kele mutindu mabuundu me sala. “Oh, beto ke kwikila Ndinga. Ya kele nyonso ya kulunga, kasi, beno zaba, ba ke tuba ti beto fwana sala *yayi*.” Mu ke kipe ve yina bawu ke tuba. Ndinga kele kieleka!

Na kuvingilaka. Yandi me zenga na kubasisa bawu, na nzila ya baprofete.

<sup>81</sup> Wapi ntangu ya kele, mpangi? Wapi ntangu ya kele, mulongi? Beno ke mona ntangu ya kilumbu, mpe kidimbu na yisi ya yina beno ke zinga? Beno lenda bakula yawu? Beno ke mona yawu?

<sup>82</sup> Bisika nyonso ntangu yayi, ya kele ve na réveil. Muntu nyonso ke na kubokutaka, milongi ke na kudilaka. Mu vwandaka tanga mosi ya bazulunale ya mutindu yankaka yina me kwiza awa na dibuundu, zulunale mosi ya mbote mingi. Mpe mu zaba nsoniki yango, mpe mu zaba bantu yango. Mpe bawu kele bantu ya busantu, ya mbote mingi, Mpangi-bakala mpe Mpangi-kento Moore, *Muzabisi ya Nkwizulu ya Yandi*. Mosi ya bazulunale ya kulutila mbote na bilanga ya kulonga, *Muzabisi ya Nkwizulu ya Yandi*. Kasi na mpasi bawu ke basisa kima kana ti ya vwanda, “Beno manga kudya, beno sambila! Beno manga kudya, beno sambila! Kuwakisa mpungi! Kuzwa. . .” Bantu yikwa ke tangaka yawu? Beno zaba. Beno ke monaka yawu ntangu nyonso, “Beno manga kudya, beno sambila! Beno manga kudya, beno sambila!” Ya kele nyonso beno ke kuwa. “Beno manga kudya, sambila! Beto ke kuzwa kupasuka ya nene ya kilumbu yayi! Ya kele na kima ya nene ke salama! Beno nyonso, beno sambila, beno sambila, beno sambila! Beto me luta ntete ve ntangu!”

<sup>83</sup> Samu na yinki bawu ke sala yawu? Samu na yinki bawu ke sala yawu? Bawu zola kuvumbuka ya nene. Bawu ke na kudila, ke na kukwikilaka ti ya ke vwanda na kuvumbuka. Bawu kele bantu ya mbote. Ya kele Samu na yinki? Yinki bawu me sala? Bawu me zaba ve kuvumbuka ya Kento ya makwela. Beno me mona? Na kuvwandaka Baklisto, bawu me kuwa kubenda ya ngunga, kasi bawu me zaba ve yina me salama. Yawu yina ke na kusalaka bawu kuwa mutindu yina. Ba zaba ti kima mosi fwana salama, kasi, beno me mona, bawu ke na kusosaka yawu ntama na bilumbu ya ntwala, yina ke kwiza, na ntangu yawu me salama kaka yimeni na ntwala ya beno.

<sup>84</sup> Ya kele kima mutindu mosi bawu salaka na bilumbu ya ntama. Bawu vwandaka kwikila na nkwizulu ya Mesiya. Bawu kwikilaka ti ya ke vwanda na muntu ke kwiza na kutekila. Kasi ya vwandaka kaka na ntwala ya bawu, mpe bawu zabaka yawu ve. Bawu zabaka yawu ve. Bawu kwikilaka ti muntu mosi ke kwiza na ntwala yina ke tekila Mesiya, mpe bawu zengaka yintu ya yandi. Mpe kufwaka Mesiya ya bawu, samu ba pesaka profesi ti ba ke vwanda ya kufwa meso. Osée tubaka mutindu yina.

<sup>85</sup> Mpe Mpeve mosi, yina zonzaka na nzila ya Osée, zonzaka na nzila ya Jean mpe tubaka dibuundu na bilumbu yayi ya nsuka ke vwanda “kinkonga, mpe mpofo, mpe ke tula Yandi na ngaanda ya dibuundu.” Bawu kondwaka na kumona baprofesi yina kulungisama. Kasi, na kuvwandaka na kati kuna, bawu bakulaka ti kima fwana kusalama. Bawu ke bakula kaka yawu ve. Bawu ke bakula yawu ve. Mingi mutindu ba-Juif ya bantangu ya ntama; Laodicée ya kufwa meso; bivwama, theologie, mbeni ya Dibuundu, mbeni na ntwala ya Nsangu. Beno tala mutindu ba-Juif yina vwandaka mbeni ya Jean. Beno tala mutindu bawu vwandaka mbeni ya Yesu, na yina Yandi vwandaka Yandi yina bawu tubaka ti bawu vwandaka vingila.

[Makelele na Binzonzolo—Mu.] Mu banza ti beto me sala fusible mosi kupasuka. Mu banza ti yina me zenga kubaka ya bande, mpe. Ya me sala ve. Mbote mingi.

<sup>86</sup> Ba vwandaka bambeni na ntwala ya Nsangu.

Yina ke na kusalamaka, kele ti ya ke na kumataka ntangu nyonso; mosi na mosi ya beno kele nzutu ke basisaka tiya. Ya kele ve na mutindu ya kubumba dibuundu na mutindu ya kulunga na kati ya bawu, na yisi ya bantangu yina. Samu ti, beno me mona, mosi na mosi ya beno ke basisaka makumi tatu na sambwadi ya celcius ya tiya, na kutala. Mpe beno ke vwandaka kaka ve kuna mutindu yina; beno ntangu nyonso ke basisaka tiya. Ya kele na klime mingi na kati awa ntangu yayi samu na kukangisa kisika yayi na madidi. Kasi, na tiya ke na kubasika na banzutu, beto—beto lenda ve.

<sup>87</sup> Beno tala, mbeni! Kasi, ntangu yayi, mutindu ba-Juif ya ntama, ya kufwa meso! Ba kele na Laodicée. Ba kele “kinkonga, na mpasi, na mawa, mpe zaba yawu ve.” Kilumbu ya bimvwama, ya malongi ya nene ya théologie, ya ndongosolo ya nene, mpe ntangu yayi bawu me kuma bambeni na ntwala ya Nsangu. Ba zola kima ve ya kusala na Yawu, kaka mutindu ya vwandaka na bilumbu yina ntangu Yesu ya Nazareth vwandaka na zulu ya ntoto.

<sup>88</sup> Ya kele samu na yina bantu, na kilumbu ya Noé, kotaka ve na nzasa, samu bawu zabaka ata fyoti ve nsangu to munati-nsangu. Ya kele kaka samu na yina bawu kufwaka, ya kele samu ti bawu zabaka ve ngunga yina bawu vwandaka zingila. Bawu zabaka ve ti Nzambi ke sadila na disumu mutindu Yandi silaka ti Yandi ke sala yawu. “Yandi ke bebisa muntu, na ntwala ya ntoto.” Yandi pesaka profesi ya yawu. Yandi zolaka kutuba yawu. Mpe Yandi zola kutuba yawu bubu yayi mutindu Yandi salaka kuna.

<sup>89</sup> Kasi bantu, na kisika ya kuvwanda mbote na ntwala ya Noé, ba vwanda tala yandi muntu ya mfinda. Ba kwikilaka ve ti yandi vwandaka profete. Beno zaba, Yesu, Yandi Mosi, tubaka na beto mutindu ba sekaka Noé na bilumbu ya Noé, ba sekaka yandi, ba bokilaka yandi fanatiki mpe nyonso yina. Kasi bawu zabaka

ve ngunga ya bawu. Bawu zabaka ve kilumbu. Ba zabaka ve kidimbu. Ba zabaka ve nsangu. Bawu zabaka ve munati-nsangu, kasi bawu tulaka yandi na kati-kati ya bawu mpe sekaka yandi. Yesu tubaka, “Mutindu ya vwandaka na bilumbu ya Noé!”

<sup>90</sup> Na Israel na yinsi ya yandi, mpe bima nyonso me vwanda ntangu yayi, mpe Nsangu ke na kukwendaka kaka na ntwala na mutindu ya kulunga, wapi kilumbu beto ke na kuzingila, mpangi? Wapi kisika beto me kuma?

<sup>91</sup> Bawu zabaka ve kilumbu. Bawu zabaka ve. Ya kele samu na yina bawu kondwaka yawu, ya kele samu ti bawu zabaka yawu ve. Bawu vwandaka mutindu mosi bubu yayi, mutindu mosi bantu ya bubu yayi, ya kufwa meso na nzila ya bimbangi ya science, na nzila ya basysiteme ya malongi, na nzila ya baseminere ya théologie. Mpe bima yina kufwaka bawu meso na kilumbu yina, ya me sala kima mutindu mosi bubu yayi. Ya me kufwa bawu meso, dyaka.

<sup>92</sup> Mpe, dyaka, kukulumuka, kukulumuka ya nsangu mpe ya munati-nsangu! Noé vwandaka ve bantu ya science. Yandi vwandaka ve muntu yina longukaka. Yandi vwandaka fermier ya mputu, ya kukulumuka, na nsangu ya pete. Ya vwandaka ya pete mingi samu na luzabu ya bawu ya nene.

Mutindu mosi ya kele bubu yayi! Nzambi ke salaka yawu ntangu nyonso ya pete, samu na kuzwa bantu yina ke kwikila mpe ke tula kivuvu na Yandi. Ya kele mutindu yankaka, kaka Nsangu ya mutindu yankaka, kasi Nzambi mosi. Ntangu yayi mu zola ti beno kwikila Yawu mpe beno bakula ti Nzambi zonzaka Yawu.

<sup>93</sup> Yesu tubaka ti bawu sekaka profete ya Yandi, Noé. Mpe mutindu bawu sekaka na kilumbu yina, mutindu mosi bawu ke sala dyaka yawu na Nkwizulu ya Yandi. Bawu ke sala kima mutindu mosi.

Ya kele samu na yina Pharaon dyamaka na mubu. Yandi zabaka ata fyoti ve kilumbu ya yandi. Yandi zabaka ata fyoti ve yina vwandaka salama. Yandi vwandaka ya kukotuswa na bisalu ya science ya nsungi ya yandi, na kutungaka bambanza na ngolo ya bampika. Yandi vwandaka mingi—yandi vwandaka na bisalu mingi, samu na kuzaba bweso yina yandi kuzwaka, mpe yandi bikaka kukwenda munati-nsangu profete ya Nzambi na ntoto ya kuyuma. Yandi zabaka yawu ve. Ya kele samu na yina bima kusalamaka mutindu yawu kusalamaka. Yandi zabaka yawu ata fyoti ve. Kana yandi zolaka kaka kuzaba Ndinga ya nsilulu ya Nzambi, samu na bantu yina!

<sup>94</sup> Mpe kana mabuundu bubu yayi lendaka kaka kuzaba, kana mabuundu zolaka kaka kuzaba Ndinga ya Nzambi yina salaka nsilulu yayi samu na ngunga yayi, samu na bantu, bawu ke kufwa ve.

Kana Amerika lendaka kaka kuzaba musiku ya ngudi yina yandi salaka, yandi zolaka basisa ve Babiblia na balukolo, kukatula Nkumbu ya Nzambi na zulu ya mbongo, mpe kusila kukwikama na yinsi na kusambilaka Nzambi. Kasi yandi zaba yawu ve. Samu na yinki? Yandi kele mpofu, kinkonga. Yandi lenda ve kuzaba menga ya bana-babakala ya ntalu yina yina kufwaka na bilanga samu na bweso yayi. Ba me zimbana bawu; ba kele putulu.

<sup>95</sup> Kasi ya kele na Mosi Yina ke bambuka moyo na menga ya bapofete yina basikaka, ntalu yina ya lombaka na kunata Nsangu ya mbote yayi na beto bubu yayi. Mutindu ba kudyaka mafunda na bankosi, mpe ba losaka na kati ya mabulu, ba zengaka na bingwegwe, ba yokaka, komaka na bakulunsi! Nzambi zaba yawu.

Dibuundu me zimbana bapofete ya bawu. Ba “ke na nsatu ya bawu dyaka ve,” landila yina ba ke tubaka. Kasi Nzambi zaba ti Yandi fwana vwanda na bawu; Yandi ke zenga bantu ya Yandi na nzila ya Ndinga ya Yandi. Kasi Yawu kele kieleka kima ya ntama samu na bawu na kilumbu yayi. Ba ke na kuzaba Yawu ve. Ya kele samu na yina bawu kele na kondisyo na kati ya yina bawu kele. Ya kele samu na yina bawu kele “kinkonga, na mpasi, mpofu, na mawa, mpe zaba yawu ve,” samu ti bawu ke na kuzaba ve ngunga yina beto ke na kuzingila. Bawu ke na kutala yawu ve.

<sup>96</sup> Moise, yandi zabaka kilumbu ya yandi mpe mbokolo ya yandi, ntangu yandi monaka nsilulu ya Ndinga ya Nzambi samu na kilumbu yina kusiamisama. Yandi zabaka na ntangu yina, mpe bakulaka yina yandi vwandaka mpe yina yandi zolaka sala, na nzila ya Ndinga ya nsilulu. Na yawu yandi vwandaka na boma ve na yina muntu mosi tubaka. Yandi vwandaka ve na nsoni ya nsangu ya yandi, ata ti konso nganga-nzambi mpe konso pharaon, nyonso, lutumu nyonso, vwandaka wisana ve na yandi. Kasi yandi zabaka ntangu yandi monaka Nsemo yina, Dikunzi ya Tiya yina vwandaka kuna na divunda yina, mpe tubaka na yandi Ndinga yina ba silaka samu na kilumbu yina, mpe tubaka, “Mu me bokila nge na kwenda sala yawu.” Yandi talaka ve boma ya kubangisa ya nene ya ntinu. Yandi kwendaka kuna samu na kunata bantu yina na exode, mutindu Ndinga ya Nzambi silaka.

<sup>97</sup> Na kumonaka nsilulu me siamisama, yandi salaka ti bantu kukubama samu na kubasika ya bawu. Wapi ntangu? Ntangu yandi monaka nsilulu ya Nzambi kusiamisama. Beno bambuka moyo, yandi kimaka na théologie ya yandi; yandi kimaka na malongi ya yandi. Kasi ntangu yandi monaka Ndinga ya Nzambi me talana, yandi monaka Yawu me siamisama, “MU KELE YANDI YINA KELE,” Kuna yandi kipeke ve yina muntu nyonso vwandaka tuba. Yandi vwandaka na boma ve na yina Pharaon zolaka sala na yandi. Yandi vwandaka na boma ve na yina bayankaka ya bawu zolaka sala. Yandi vwandaka kaka na boma ya Nzambi, ti yandi lendaka bakula yimbi Nzambi, to mutindu

mosi ti yandi lendaka bakula yimbi Nzambi. Yandi vwandaka na boma ve ya bantu mpe yina bawu zolaka tuba to yina bawu zolaka sala. Yandi vwandaka kaka na boma ya Nzambi, na manima yandi zabaka ti ya vwandaka Ndinga ya Nzambi.

<sup>98</sup> Yandi lendaka ve kubakula wapi mutindu muntu mutindu yandi lendaka tindama kuna. Kasi ntangu yandi zabaka, na nzila ya Ndinga me siamisa, yina yawu vwandaka, na yina yandi vwandaka na boma ve ya balutumu ya ntinu. Kana beno lenda zaba kaka, kana beto bubu yayi lendaka kaka kuzaba! Moise zabaka yawu ntangu yandi monaka Ndinga me siamisama, yandi monaka nsiamisa me monisama, Yandi vwandaka ya kukubama samu na kubasika ya bantu.

Job zabaka ve ti ya vwandaka Nzambi. Ntangu nyonso yina dyabulu lenda—lenda sala beno kukwikila ntangu mosi ti mwa kumekama yina beno ke na kulutilaka kele—kele Nzambi. . . ke na kupesa beno kitumbu! Ya vwandaka Nzambi vwandaka meka na kutalisa yandi kima. Job zabaka yawu ata fyoti ve tii kuna yandi monaka vision. Mutindu Moise; ntangu Moise monaka vision, Dikunzi ya Tiya na divunda, yawu siamisamaka. Mpe ntangu. . .

Job, na kyuvu ya yandi, “Kana muntu kufwa, yandi lenda zinga dyaka? Mu ke mona yinti kufwa, mpe yawu ke zinga dyaka. Mu ke mona fololo ke kufwa, mpe yawu ke zinga dyaka.” Yina vwandaka kyuvu ya yandi. “Kasi muntu ke lala, mpeve ya yandi ke basika, yandi ke vwanda kuna. Bana ya yandi ke kwiza dila, mpe yandi ke zaba yawu ve. Oh, ti Nge bumba munu na ntoni tii nkele ya Nge ke luta!” Yandi lendaka ve na kubakula samu na yinki fololo ke kufwa mpe ke zinga dyaka, wapi mutindu dikasa ke katuka na yinti, ke kubwa, mpe ke lala na ntoto, mpe ke vutuka dyaka na printemps. Yandi tubaka, “Muntu ke lala, mpe wapi kisika yandi ke kwenda? Mu ke kwikila Nzambi; kasi yinki ke kuminaka na muntu?”

<sup>99</sup> Kasi na yina kilumbu mosi nsemo bandaka na kulezima, bidumu bandaka na kuboka, Mpeve kwizaka na zulu ya profete. Mpe yandi monaka nkwezulu ya Muntu Yina lendaka tula diboko ya Yandi na zulu ya muntu ya masumu, mpe Nzambi ya santu, mpe kusala nzila ya kyamvu. Na yina yandi bokaka, “Mu zaba ti Mukudi ya munu kele moyo! Kana misyete bebisa nzutu yayi, kasi na nzutu ya munu mu ke mona Nzambi!” Yandi zabaka yina mvumbukulu vwandaka.

<sup>100</sup> Balaam kubakulaka ata mbala mosi ve Wanzio tii mulet zonzaka na bandinga. Balaam lendaka ve kuzaba ti Wanzio vwandaka ya kutelama na nzila ya yandi. Mulongi ya mpofu lendaka ve kuzaba ti ya vwandaka Nzambi ya kutelama na nzila, na kumekaka na kukanga yandi na kutekisaka dikabu ya yandi samu na mbongo. Mpe ntangu mulet tubaka na ndinga ya muntu, kuna Balaam zabaka ti ya vwandaka Wanzio ya kutelama na

nzila ya yandi, vwandaka meka na kukanga yandi na kusala yina yandi vwandaka sala.

<sup>101</sup> Oh, beno ba-denomination ya kufwa meso! Kana Nzambi lenda sadila mulet, yina kele dibaba, na kuzonza na ndinga yina yandi zaba ve, samu na kutalisa na mulongi ti yandi kele na ngaanda ya nzila, Yandi lenda ve kusadila muntu samu na kusala kima ya mutindu mosi? Bantu ya kufwa meso!

<sup>102</sup> Kana Achab zabaka kaka kilumbu ya yandi, yandi zolaka fundisa ata fyoti ve profete, Michée, na Ndinga ya Nzambi ya nsilulu samu na yandi.

<sup>103</sup> Ntangu Achab telamaka kuna kilumbu yina, yandi mpe—mpe Josaphat. Mpe ntangu bawu vwandaka na baprofete nkama yiya kuna yina vwandaka pesa profesu, na kutubaka, “Mata! Nyonso kele mbote. Achab, nge ke na kuzingaka na kati ya disumu. Nge me sala beto dénomination ya nene! Beto kele bantu ya nene. Beto kele ministere ya nene. Beto bawu yayi, beto kele banganga-Nzambi nkama yiya yina ba me longisa, to baprofete. Beto kele bantu nkama yiya, yina ba me longisa na Ndinga mpe na théologie. Beto zaba nyonso na zulu ya Yawu.”

<sup>104</sup> Na yawu, ntangu yayi, ya ke lakisa ti bawu zabaka Yawu nyonso ve. Muntu yina bawu vwandaka bokila muntu ya kulawuka, na nsungi na ntwala ya bawu, Elie, profete ya kieleka ya Nzambi, pesaka profesu, “MUTINDU ME TUBA MFUMU, ‘Bayimbwa ke kwisa kulekita menga ya nge, Achab!’” Beno me mona?

<sup>105</sup> Kasi banganga-Nzambi yina, baprofete yina bantu salaka, banzaka ti bawu vwandaka na Yawu nyonso ya kubonga. Bawu tubaka, “Tata Abraham. . . to, Tata Achab, mata! Mfumu kele na nge. Nge kele na Masonuku, samu Nzambi pesaka yinsi yayi na Israel. Ya kele ya Israel. Mata! Mfumu kele na nge.” Oh, la la!

<sup>106</sup> Kasi, beno zaba, Josaphat, mosi yina vukanaka ve na disumu mutindu Achab vwandaka, yandi monaka bima fyoti mutindu yankaka. Yandi tubaka, “Ya kele na yankaka ve?”

<sup>107</sup> Yandi tubaka, “Beto kele na mosi awa, kasi mu ke yinaka yandi.” Beno me mona? Yinki Nzambi vwandaka sala? Yandi vwandaka zenga bantu ya Yandi, na profete, dyaka. “Mu ke yinaka yandi. Yandi ke salaka kima ve kasi ke fundisa kaka munu ntangu nyonso. Mpe nge zaba ti mu kele muntu ya nene. Mu zolaka kuzwa ve seminere yayi awa kana mu vwandaka ve mukwikidi ya nene. Mu kele na bantu yina me longuka mbote. Mu tulaka bawu kuna na babuku mpe Babiblia, mpe nyonso yankaka, samu na kulonga yayi. Mpe mu zaba ti bawu kele bantu ya nene.”

Kasi kana Achab zabaka kaka nani vwandaka muntu yina, mwa muntu yayi ya mputu na kutala ya kulwata bitende, mwana ya Jimla, ya kutelama kuna, ke tuba na yandi, “MUTINDU ME TUBA MFUMU,” yandi zolaka sala ata fyoti ve kyeta ya nene



yina yandi salaka. Kasi yandi bedisaka Michée. Yandi salaka ata fyoti ve. . .

Oh, bantu, zaba nsungi yina beno ke na kuzinga! Beno tala yina salamaka. Beno tala yina ba silaka. Zaba kilumbu yina beno ke na kuzinga.

<sup>108</sup> Kana dibuundu ya denomination bubu yayi lendaka kaka kuzaba samu na yinki bawu kele ya kufundisa, mpe bamambele ya bawu ke na kukima ntama ya bawu, mutindu Israël basikaka na Égypte! Kana ba-denomination zolaka bika kaka kubedisa babande, mpe zolaka kuwa yawu! Mpe nge, mulongi, yina ke na kuwa bande yayi, kuwa! Kana nge lendaka zaba kaka ngunga yina nge ke na kuzinga, kana nge lendaka kaka kuzaba kidimbu ya ntangu, nge zolaka mona samu na yinki bantu ke na kukimaka na ba-denomination yina. Mpeve ya Mfumu, ke na kubokilaka! “Muntu ve lenda kwiza na Munu,” tubaka Yesu, “kaka kana Tata ya Munu kubenda yandi. Mpe nyonso yina Tata me, na ntangu me luta, pesa Munu, ke kwiza.”

<sup>109</sup> Mutindu mwa kento yina na dibulu ya maza, mpe nganga-Nzambi, mutindu bawu vwandaka ya kuswaswana! Biso ke na kibaka ya bubu yayi, dyaka. Bawu ke mona yawu, kasi bawu ke zaba yawu ve.

<sup>110</sup> Kana ba-Juif zabaka kaka kidimbu yina ba silaka ya Mesiya ya bawu, landila profete ya bawu ya nsuka! Malachie 3 tubaka, “Tala, Mu ke tinda munati-nsangu ya Munu na ntwala ya Munu, mpe ke kubika nzila.” Mpe bawu tubaka ti bawu vwandaka vingila Yandi.

<sup>111</sup> Wapi mutindu—wapi mutindu kieleka ya kele ya kuvukana tii na—na bubu yayi! Ba ke tuba ti bawu ke vingila kima mosi kusalama. Mabuundu nyonso ke na kusambilaka mpe ke na kumangaka madya, mpe ke tuba, “Ntangu yayi beto sambila. Beto vukana. Beto fwana kuzwa kima ya nene yina ke salama. Beto zaba ti ya kele na kima ya nene ke salama. Dibundu fwana kukubama.” Yawu yina ba ke na kusambilaka.

<sup>112</sup> Ya kele samu na yina bawu vwandaka sambila kuna. Mpe kuna kwizaka Jean Baptiste. Samu ti, yandi mangaka baseminere ya bawu, samu ti yandi salaka ya kuswaswana na yina batata ya bawu longaka. Yandi basikaka na ntoto ya kuyuma kukondwa ndongosolo. Yandi basikaka kukondwa nkingu ya yandi ya kubaluka, mutindu ba lendaka tuba yawu bubu yayi. Yandi basikaka kukondwa kikunku ya nene ya théologie. Kasi yandi kwizaka, na kuzabaka na nzila ya nsilulu ya Nzambi ti yandi zolaka samuna Mesiya.

Yandi tubaka, “Yandi kele ya kuvwanda na kati-kati ya beno ntangu yayi.” Mpe bawu banzaka ti yandi vwandaka kilawu, samu ti yandi basikaka ve na balukolo ya bawu. Biso vwandaka na kibaka, mpe bawu zabaka yawu ve. Bawu tubaka ti bawu vwandaka vingila Muntu ya mutindu yina kukwiza; mpe

Yandi vwandaka kaka na kati-kati ya bawu. Mpe bawu zabaka Yandi ve, ata ti bawu tubaka ti bawu vwandaka vingila Yandi.

<sup>113</sup> Kaka mutindu mosi, mutindu ba-Juif, ti bawu kele na kati, mutindu Bantu ya makanda na bawu, samu ti ya kele ya kupesa profesi ya kima mutindu mosi, kima mutindu mosi. Bawu tubaka ti bawu vwandaka vingila Yandi. Kasi ba-denomination ntangu yayi na nsungi ya Bantu ya makanda, nsungi ya Laodicée kele kaka mpofo mutindu bawu vwandaka, samu (samu na yinki?) ya pesamaka na profesi ti bawu ke vwanda. Ya fwana salama.

<sup>114</sup> Kana Israel lendaka kaka kuzaba kidimbu ya bawu, ba zolaka zaba ntangu ya kutalana ya Mesiya vwandaka pene-pene. Kana bawu zabaka!

Beno zaba, bilandi tubaka yawu na Yesu. “Samu na yinki misoniki ke tuba, ti, ‘Elie fwana kwiza ntete?’”

<sup>115</sup> Mpe Yesu tubaka, “Elie me kwiza yimeni, mpe bawu zabaka yandi ve. Yandi me vwanda yimeni awa, mpe bawu me kufwa yandi yimeni. Bawu me sala kaka kieleka yina Masonuku tubaka ti bawu ke sala.”

<sup>116</sup> Kana bawu zolaka zaba kaka, ti “fanatiki” yina yina vwandaka bedisa bima nyonso ya yimbi yina bawu vwandaka sala, yina vwandaka bedisa nyonso yina bawu vwandaka sala. . . Yandi tubaka, “Beno bantu ya luvunu! Beno banda ve na. . . Banyoka na matiti, beno nsungi ya banyoka, nani me longa beno na kukima nganzi yina ke na kwiza? Beno banda ve na kubanza na beno mosi, ‘Beto kele na Abraham tata ya beto. Beto kele na *yayi, yina, to yankaka.*’ Samu ti mu ke tuba na beno, Nzambi kele na lenda na matadi yayi na kutelemisa bana samu na Abraham.”

<sup>117</sup> Beno banda ve na kubanza ti beno kele na Lukutakanu ya Yinza na beno, mpe beno kele na bamambeke ya kulutila kulwata mbote na nyonso. Nzambi kele na lenda na nzila ya bampuku ya bala-bala awa na kubasisa bana samu na kulungisa Ndinga ya Yandi; bakento ya kindumba, bana ya bakento na babala-bala, binwi-malafu, bibudi ya mbongo. Yandi kele na lenda ya kusala yawu. Yandi kele dyaka Nzambi.

<sup>118</sup> Ba-denomination ya kufwa meso, mutindu Israel ya kufwa meso, ba pesaka profesi na bawu zole samu na kuvwanda mutindu yina. Mu ke na kulakisa beno yina kele mutindu mosi, tii mu ke kuma na kisika yayi yina mu zola kukuma ntangu yayi. Ya kufwa meso, mutindu ba-denomination ya Bantu ya makanda ya Nsungi ya Laodicée, kele ya kufwa meso bubu yayi mutindu bawu vwandaka kuna.

<sup>119</sup> Nsungi ya Laodicée fwana kuzwa Nsangu! Malachie 4 me tuba ti bawu ke kuzwa.

Kasi yinki bawu ke na kusosaka? “Denomination ya beto ke basisa Yawu. Kana Yawu lutila ve na nzila ya beto, ba-Baptiste,

ba-Presbytérien, ba-Assemblée, ba-Unitaire, ya kele...kana beto basisa Yawu ve, Ya kele kieleka ve.”

Kima mutindu mosi bawu salaka na kilumbu yina! Mpe yawu kwizaka mpe kwendaka, mpe bawu zabaka yawu ve. Bawu zabaka yawu ve, ata ti yawu lungisaka konso Ndinga. Yesu tubaka, “Ba me sala mutindu ya sonamaka na zulu ya bawu. Mutindu mosi ba ke sala Mwana ya muntu,” ba ke manga Yandi.

<sup>120</sup> Ntangu yayi beno tala, mutindu mosi ntangu yayi na bilumbu ya Bantu ya makanda, landila Masonuku ya nsilulu ya Malachie 4.

Yina, Yesu tubaka, “Disonuku nyonso me twadisama na kimpeve, mpe ata kitini mosi ve ya Yawu lendaka kaka kulungisa yawu.” Ya kele na mutindu ya kukanga Masonuku na kulungisama ve. Nyonso fwana kusalama. Mpe Yesu tubaka ti ya ke salama. Mpe awa beto ke mona ti ya me salama. Beto ke mona yawu.

<sup>121</sup> “Kuvutula dyaka” yinki, na bilumbu yayi ya nsuka? Beno bampangi ya ba-denomination, beno kuwa! Kuvutula pentecote, feti ya ntete. Mutindu Yawu vwandaka na mbandukulu, mutindu mosi Yawu ke vutuka dyaka na ntuala feti ya Mpungi ya Israel kuwakana. Ya fwana vutuka dyaka! Ya fwana vwanda na kima mosi samu na kusala yawu. Malachie 4 ke tuba ti ya ke vutula dyaka Lukwikilu ya batata, na bana, yina ke salama.

<sup>122</sup> Kana Israel zabaka Mesiya ya bawu, kidimbu ya nsilulu, bawu zolaka vwanda ve kisika bawu kele bubu yayi. Kana bawu... Kasi samu na yinki bawu salaka yawu ve? Ya kele kyadi. Samu na yinki bawu salaka yawu ve? Samu Nzambi tubaka ti bawu ke sala yawu ve. Bantu yikwa ke kwikila yawu, beno tuba, “Amen.” [Dibuundu me tuba, “Amen.”—Mu.] Nzambi tubaka ti bawu ke sala yawu ve.

Mpe ya kele Nzambi mosi tubaka, na Nsungu ya Dibuundu ya Laodicée, yayi ke salama, mpe yawu yayi na ntuala ya bawu. Wapi mutindu bawu lenda sala kima yankaka kasi kusala yawu?

<sup>123</sup> Kana bawu zabaka kaka kidimbu ya nsilulu ya Mesiya, kidimbu ya Mwana ya muntu! Yandi kwizaka na nkumbu ya Mwana ya muntu. Ntangu yayi, Yandi vwandaka na nkumbu, na nzila ya Nsungu ya Pentecote, na Mpeve-Santu, Mwana ya Nzambi. Ntangu yayi, kima ya kulanda kele Millenium, Mwana ya David. “Bana” tatu, Nzambi mosi. “Tata, Mwana, Mpeve-Santu,” mosi, Nzambi mosi. Mwana ya David, Mwana ya Nzambi... Mwana ya David, Mwana ya muntu, Mwana ya Nzambi, kele Nzambi mosi ntangu nyonso, kaka na bisalu tatu ya kuswaswana.

<sup>124</sup> Mutindu mosi kele “Tata, Mwana, mpe Mpeve-Santu” Banzambi tatu ve, kasi Nzambi mosi na bansungu tatu, bisalu tatu, mutindu Tata, Mwana, mpe Mpeve-Santu.

Kasi, mutindu bubu yayi, ya kufwa meso na nzila ya binkulu mutindu bawu vwandaka kuna, ya kufwa meso na nzila ya binkulu, bawu ke mona yawu ve. Samu na yinki ba lenda mona yawu ve? Ba ke mona yawu ata fyoti ve. Beno bambuka moyo, ya kele MUTINDU ME TUBA MFUMU.

Beno ke tuba, “Samu na yinki nge ke tuba yawu na yina?”

Kaka mutindu Jean kusalaka, mutindu mosi na bayankaka ya bawu kusalaka. Ya kele na mosi ya kukangama awa mpe kuna, ba fwana basisa bawu. Oh, mameme ya Nzambi, beno kuwa Ndinga ya Nzambi! “Mameme ya Munu ke kuwaka Ndinga ya Munu.”

<sup>125</sup> Kento yina na dibulu ya maza zabaka kilumbu ya yandi, na nzila ya kidimbu ya Mesiya. Yandi vwandaka na kisika ya yimbi. Yandi zolaka ve kubebisa ntangu ya yandi na mabuundu ya bawu ya ntama, na mutindu bawu vwandaka sala. Bawu vwandaka zinga konso mutindu, mpe, bima yina bawu vwandaka sala, yandi vwandaka kwikila na bima yina ve. Kasi yandi zabaka ti Mosi ke kwiza kilumbu mosi. Mwa muntu yayi ya mawa kuna, na lweka ya dibulu ya maza; yandi talaka Kima yina yandi vwandaka sosa, ntangu Yandi bandaka na kutalisa na yandi kinsweki ya ntima ya yandi, tubaka na yandi na kati ya disumu yina yandi vwandaka zingila.

Yandi tubaka, “Tata, mu ke mona ti Nge kele Profete.” Ntangu yayi, bawu kuzwaka mosi ve bamvula nkama yiya. Yandi tubaka, “Mu ke mona ti Nge kele Profete. Mpe mu zaba ti ntangu Mesiya ke kwiza Yandi ke sala bima yayi.”

Yandi tubaka, “Mu kele Yandi”.

<sup>126</sup> Yandi zabaka. Ya vwandaka dyaka ve na kyuvu, “Wapi mutindu Nge lenda siamisa yawu?” Ya siamisamaka yimeni. “Ntangu Mesiya ke kwiza, yayi kele yina Yandi ke sala.”

Mbote, kana yandi lenda zaba yawu na nzila ya Masonuku, beto lenda zaba ve Bansemo ya nkokila mpe kidimbu ya bubu yayi?

“Beto zaba ntangu Mesiya ke kwiza Yandi ke talisa na beto bima yayi nyonso. Yandi ke tuba na beto yayi.”

Yandi tubaka, “Mu kele Yandi yina ke na kuzonzaka na nge.”

<sup>127</sup> Ata kyuvu dyaka. Yandi kwendaka, mpe yandi tubaka na bantu, “Beno kwiza, mona! Yandi yayi awa.” Ya vwandaka dyaka ve na kyuvu na yandi. Ya sukaka, samu yandi zabaka kilumbu yina yandi vwandaka zinga. Yandi zabaka yawu.

<sup>128</sup> Mutindu mosi salaka Nathanaël, Hébreux ya nene, ntangu yandi monaka kidimbu yango ya Mesiya yina ba silaka kuna; ata lutangu ya banganga-nzambi, ata lutangu ya bima nyonso yankaka.

Yinki ya salaka? Ya ningisaka banganga-Nzambi, na kumona bantu yina kukatuka mabuundu mpe kukwenda. Yandi tubaka, “Kana mosi ya beno kuvwanda na lukutakanu ya Yandi, ba ke tula beno na ngaanda. Beto ke basisa beno kaka na dénomination.”

<sup>129</sup> Mutindu mosi ya kele bubu yayi. “Beto ke basisa beno na organisation ya beto kana beno vwanda na lukutakanu ya yandi.”

<sup>130</sup> Beno bambuka moyo na muntu ya kufwa meso? Tata mpe mama lendaka ve na kupesa mvutu; ba vwandaka na boma. Samu, bawu tubaka, “Muntu nyonso yina ke kwenda mona Yesu, to—to ke vwanda na balukutakanu ya Yandi, ba ke tula bawu na ngaanda.” Kasi, muntu yina ya kufwa meso lendaka zonza samu na yandi mosi, yandi yina vwandaka mbala mosi ya kufwa meso lendaka kuna kumona.

<sup>131</sup> Munu, yina vwandaka mbala mosi mpofu, lenda ntangu yayi kumona. Munu, yina zabaka ve bima yayi, Yawu me zabana na munu na nzila ya Mpeve-Santu. Ba-denomination, beno bika, samu ti bawu ke na kwiza, na mutindu nyonso! “Kana ba zangula munu na ntoto, Mu ke benda bantu nyonso na Munu.”

<sup>132</sup> Nathanaël zabaka yawu. Yandi zabaka yawu.

<sup>133</sup> Kaka mutindu nsiamisa ya Masonukwa ya Moise, Ndinga yina me siamisama. Moise zabaka ti yina vwandaka nsilulu ya kilumbu, samu ya vwandaka Masonuku, ata ti ya vwandaka ngitukulu. Yandi tubaka, “Nani mu lenda tuba na bawu. . . Mu ke tuba na bawu ti mu monaka Nsemo mosi awa na ntoto ya kuyuma. Wapi mutindu mu lenda tuba na bawu ntangu yayi ti ya vwandaka Nsemo na manima awa, mpe Nsemo yayi tubaka na munu na kukwenda kuna?”

Yandi tubaka, “Ya kieleka, Moise, Mu ke vwanda na nge.” Mpe kaka ve. . .

<sup>134</sup> Yandi lakisaka ve Yandi mosi kuna na Egypte; kaka na nzila ya bimangu mpe bidimbu. Kasi ntangu Yandi vukisaka bawu nyonso kintwadi, Yandi monanaka dyaka na bawu, mpe siamisaka ministere ya Moise na ntwala ya Misolami mpe bayina ba bokilaka na kubasika. Ntangu profete yina basisaka bawu na yinsi yina mpe nataka bawu na kisika, kuna Dikunzi ya Tiya monikaka dyaka, mpe na zulu ya Mongo ya Sinai.

<sup>135</sup> Ya ke fwanana na bubu yayi. Hmm. Amen! Lukumu na Nzambi! Ya kele mingi kulutila luzingu samu na munu. Mvula ya munu ke na kukwendaka na ntwala, mpe mu ke mona ngunga ya mambu ya yimbi mpe ya bima ya kukondwa buzitu kukombula bayinsi mpe nyonso, na yina mu ke tala na manima mpe mu ke mona yina me salama. Ntima ya munu ke na kifuluka na kyese, na kuzabaka ti na manima ya mwa ntangu fyoti tabernacle ya mvwandulu ya ntoto yayi ke beba, kasi mu kele na mosi yina ke na kulingilaka kuna. Mu ke na kumeka na kubenda bantu,

na kuzenga bawu na bima yayi mpe nyonso, na kubasisa yawu; na kutalisa bawu, na nzila ya Masonuku, ti Nzambi kele ya kutelama kuna; na nsiamisa ya Dikunzi ya Tiya, yina bankama mpe mafunda me mona, mpe Yawu bakamaka mpe, na ntwala, na camera, ntangu na manima ya ntangu, samu na kusiamisa yawu.

<sup>136</sup> Bantu ya bilanda-landa telamaka. Ya kieleka, ya fwana salama. Bantu ya bilanda-landa kutelamaka na kilumbu ya Moise mpe salaka kima mutindu mosi. Nzambi tubaka, “Kabwana nge mosi, Moïse. Kuvukana ve na bawu. Mu ke luka bawu.” Mpe yinza me nata bawu. Mpe ya kele mutindu mosi bubu yayi; me vutuka mbala mosi kaka na yinza, na kulutilaka na banzila ya yimbi samu na kuzwa mbongo mpe nyonso yankaka. Beno me mona?

<sup>137</sup> Kidimbu ya Masonuku ya Moise! Yandi vwandaka—yandi vwandaka profete yina ya nene ya Nzambi yina kwendaka kuna samu na kuvulusa bawu, mpe bawu zabaka yawu. Bawu zabaka kidimbu. Yandi vwandaka nsilulu ya kieleka ya Masonuku, yina me siamisama.

<sup>138</sup> Yesu vwandaka nsilulu yina ya Masonuku, yina siamisamaka na kento yina. To, Yandi vwandaka Ntendulu. Yesu vwandaka Ntendulu ya Masonuku. Luzingu ya Yandi Mosi tendulaka Masonuku.

<sup>139</sup> Beno ke mona ve Nsangu ya ngunga? Beno lenda zaba kisika beto kele? Nsangu yawu mosi, na Masonuku, ke tendula na beno ngunga yina beto ke na kuzinga. Ya kele ntendulu.

<sup>140</sup> Yesu tubaka na Israel, “Kana nge zabaka kaka kilumbu ya nge.” Kilumbu mosi, na kuvwandaka na zulu ya Mongo ya ba-Olive, Yandi talaka kuna, tubaka, “Jérusalem, O Jérusalem!” Yandi dilaka. Yandi talaka na yisi. Yandi monaka.

Ve samu na kufwanikisa, ya lendaka vwanda, na mutindu. Na nokwila yankaka yina, na suka yankaka yina, na kutala na ngunga ya kumi, ntangu mu monaka dibuundu ya ndumba yango. Na kati ya ntima ya beto, beto ke kuwa Mpeve-Santu kubwisa maza ya meso.

“Jérusalem, O Jérusalem, bambala yikwa Mu me zola kuvukisa nge. Kasi yinki nge me sala? Nge kufwaka bapofete yina Mu fidisaka na nge. Nge kufwaka bawu.”

Mpe Bansangu yina ba me fidisa na dibuundu, bubu yayi, me kufwa na ba-dogme ya bawu ya ba-denomination. Masonuku me kufwa na nzila ya ba-dogme ya bawu. Yesu tubaka, “Kana beno zabaka kaka kilumbu ya beno! Kasi, ya me kuma ntama ntangu yayi, ntangu me luta mingi ntangu yayi.” Mutindu mosi ya kele na mabuundu!

<sup>141</sup> Mu ke kwikwila, na ntima ya munu ya muvimba, yandi me luta mpulusu. Ata nyonso yina beno zola kubanza samu na yawu, ya kele dibanza ya beno mosi. *Yayi* kele ya munu. Beno me mona?

Beno kele na nsatu ya dibanza ya munu ve. Kasi mu ke kwikila ti yandi me luta mpulusu, mpe me vwanda, bamvula tanu to sambanu me luta. Mu ke bambuka moyo. Beno ke bambuka moyo na Chicago. Beno tala mbote yina salamaka tuka kuna, mpe beno tala yawu ke landila na kusalama. Beno me mona? Beno bambuka moyo, nkumbu ya munu kele ya kukangama na zulu ya yawu. Ya kele ya kukangama na zulu ya yawu kuna. Ya kele MUTINDU ME TUBA MFUMU. Beno mona kana yandi me beba ve, ke na kulandilaka.

142 Beno tala na mvula 1933, mutindu yawu tubaka bakento ke sala na bilumbu yayi ya nsuka. Mutindu yawu tubaka bantu. . . Mutindu Mussolini, mutindu yandi ke kuma na nsuka ya yandi. Mutindu Hitler ke vwanda na nsuka mosi ya misitiki. Mutindu ti ba-isme tatu ke kota na communisme. Mutindu ba-masini ke kuma, na kutala mutindu diki. Mpe mutindu bakento ke lwata bilele mpe ke talana mutindu babakala, mpe mutindu bilele ya bawu ya yisi; mpe na nsuka ke kwiza na kutalanaka, ya kulwata kima mutindu makasa ya bafike, na zulu ya bawu. Mutindu bawu ke sala kukondwa buzitu, mutindu bawu ke sala na kilumbu yayi. Beno tala yina bawu me sala. Mpe ya kele kaka na ntuala ya beno, kuna.

143 Kana bakento ya Baklisto lendaka kaka. . .bakento ya Baklisto ya nkumbu lendaka zaba kaka, lendaka zaba ti mpeve ya yimbi na zulu ya bawu kele ya dyabulu, samu na kusala bawu kuzenga nsuki ya bawu. Dyabulu kele kaka kima yina lendaka sala yawu. Ya kele ya kuswaswana na Ndinga ya Nzambi samu na beno, kaka mutindu ya vwandaka na nsaba ya Eden. Yinki bawu salaka? Kana bawu lendaka kaka kuzaba! Bawu ke meka na kutuba, “Oh, mwa mulongi yina ya exalté ya ntama, ke tuba!” Ya kele munu ve. Mu ke tuba na beno ve yinki kusala. Mu ke na kutangaka kaka Ndinga. Kana bawu lendaka kaka kundima ti ya kele dyabulu.

144 Bawu ke bokila bawu mosi Baklisto. Yesu tubaka, “Wapi mutindu beno lenda bokila Munu, ‘Mfumu,’ mpe kusala ve bima yina Mu ke tuba na kusala?” Ba lenda vwanda ve Baklisto. Mu kele ve zuzi ya bawu, kasi mu ke na kutuba kaka yina Ndinga me tuba. “Wapi mutindu beno lenda bokila Munu, ‘Mfumu,’ mpe kuna kusala ve bima yina Mu tubaka na kusala?” Mpe Ndinga ya muvimba awa kele luzayikisu ya Yesu Klisto. “Wapi mutindu beno ke bokila Munu, ‘Mfumu?’”

145 Kana bawu lendaka kaka zaba ti ya kele dyabulu, mpeve ya yimbi. Mwa bakento ya mbote kuna. . .

146 Mu banza ti yayi kele kisika ya kulutula yimbi yina mu me monaka ntete ve na luzingu ya munu, Jeffersonville, na Indiana, samu na bakento ya kinkonga. Mu me vwanda na Hollywood. Mu me vwanda bisika nyonso. Mu me vwanda na yinza ya muvimba, mpe mu me monaka mitindu nyonso ya mvindu. Mu me mona

yawu na Paris. Mu me mona yawu na Angleterre, yina kele mfumu ya bawu nyonso.

<sup>147</sup> Mu banza ti Angleterre ke dyama kilumbu mosi na yisi ya mubu. Ya ke fwanana na yawu; yimbi, mvindu, kubeba! Yina kele poto-poto ya yinza, bantu ke swaswana, ke manga ya muvimba masonuku yina mu me monaka ntete ve na luzingu ya munu. Yandi me kuma yawu samu yandi me manga Kieleka.

<sup>148</sup> Billy Graham tubaka ti yandi fwanaka katula kento ya yandi na ba-parc; bima ya kuvukisa banzutu vwandaka salama na kati-kati ya babakala mpe bakento, bana ya babakala mpe bana ya bakento, kaka kuna na parc, na meso ya bantu. Yandi kumaka poto-poto; mutindu mosi na France, mutindu mosi na yinza ya muvimba. Mpe mutindu mosi Etats-Unis, ke na kukumaka ntwadisi ya bawu nyonso!

<sup>149</sup> Beno tala bubu yayi. Ke sala bawu kuzenga bansuki ya bawu, kulwata bakupe, bapantalo, kunwa makaya, mpe kubokila bawu mosi mikwikidi. Beno ke bakula ve, mpangi ya kento, to kento. . . Muy zola tuba, beno lemvokila, mpangi ya munu ya kento ve; kusala kima mutindu yina. Beno ke bakula ve ti ya kele dyabulu? Kasi yinki. . .

Mutindu ba-Juif ya ntama, beno ke kwikila ve Ndinga yina me siamisama ntangu Yawu me siamisama na beno. Beno ke kangama kaka na binkulu ya denomination ya beno yina ke tuba ti ya kele nyonso mbote kaka. Beno ke zonza na bandinga, beno ke dumuka mpe ke kulumuka, beno ke yimba na kimpeve, mpe ke zenga nsuki ya beno. Beno lenda banza Muklisto kusala yawu?

Mu me monaka bampeve ya yimbi, mu me monaka banganga-nkisi, mu me monaka bawu kutuba na bandinga mpe kutendela, mpe kudumuka mpe kukulumuka mpe kubina na kimpeve; kunwa menga na mukwa ya yintu ya muntu, mpe kusinga Nkumbu ya Yesu Klisto.

<sup>150</sup> Beno ke tuba, “Mu kele ya dibuundu. Alleluya! Nkembo na Nzambi! Mu. . .” Beno kele ya yinki?

Dibuundu kele Ndinga! Mpe Ndinga ke tuba, “Ya kele nsoni samu na beno na kusala yawu.”

Beno nkonga ya bantu ya kufwa meso ya ba-Pharisien, ke twadisa bana ya ya mawa yina na difelo mutindu yina; samu ti beno kele na boma ya kukondwa kuzwa dimpa, mpe ba ke basisa beno na denomination ya beno kana beno banda kima na zulu ya Yawu. Nsoni na beno, beno bantu ya luvunu! Beno vwanda na nsoni ya yawu. Na kumonaka ngunga ke na kubelama mutindu yayi, mpe beno ke baluka na binkulu ya beno na Ndinga ya Nzambi. Wapi mutindu beno lenda, beno kele ya kufwa meso!

<sup>151</sup> Biblia me tuba ve ti beno vwandaka ya kufwa meso? Beno lenda bakula ve ti beno kele ya kufwa meso? Biblia ke tuba ti beno vwandaka. “Mpe beno kele kinkonga, na mpasi, na mawa,



mpofo, mpe beno zaba yawu ve.” Ntangu beno ke banza ti beno kele na dibuundu ya kulutila nene na kati ya mbanza, mpe beno ke sala *yayi*, *yina*, to *yankaka*; mpe Biblia ke tuba ti beno kele mputu mutindu beno lenda vwanda, mpe beno kele ya kufwa meso. Mpe Yandi kele dyaka ya kutelama na mwelo, ke na kumeka na kutekisa beno mwa nkisi ya meso; kutekisa beno yawu ve, kasi kupesa yawu na beno, mpe beno zola kuzwa yawu ve. Yina ke lungisa Masonuku.

<sup>152</sup> Wapi kilumbu beno ke na kuzinga, bantu? Beno me zaba ngunga, beno me zaba kidimbu?

<sup>153</sup> Kana bawu lendaka kaka kuzaba, bakento yina, ti ya kele dyabulu. Ya kele dyabulu ya kubeba, na nkumbu ya nsambululu. Yandi ke vwandaka ntangu nyonso mutindu yina. Yandi kwizaka na konso profete, yandi kwizaka na konso ndwenga, yandi kwizaka mpe na Yesu Klisto, mutindu muntu ya lukwikilu. Mpe Biblia ke tuba ti yandi ke “vwanda pene-pene mingi na bilumbu ya nsuka,” ata mpe bantu ya Pentecote, “mpe ke vuna bantu ya kieleka yina ba soolaka,” na ngaanda ya dibuundu yango ya Pentecote, “kana ya lendaka salama.” [Kisika ya mpamba na bande—Mu.]

<sup>154</sup> “Fyoti,” Yandi tubaka, “samu mwelo kele ya fyoti mpe nzila kele ya fyoti mingi, mpe kasi bantu fyoti kaka ke mona yawu. Samu mutindu ya vwandaka na bilumbu ya Noé, kisika myoyo nana vulukaka, mutindu mosi ya ke vwanda na nkwezulu ya Mwana ya muntu.” Beno banza na yawu! Wapi kilumbu beto ke na kuzingila? Beno zaba ngunga, beno zaba kilumbu?

Mu ke na kubakaka ntangu ya beno mingi, kasi mu kele dyaka na mwa baminuti fyoti. Beno me mona?

<sup>155</sup> Ke sala bawu kuzenga nsuki ya bawu. “Mbote,” bawu ke tuba, “dibuundu ya beto ke kipeke yawu ve.” Beno zaba samu na yinki? Bawu kele ya kufwa meso.

“Ya ke yimbi ve na kuzenga bansuki ya beno.” Biblia me tuba ti ya kele! Ya kele mpe kima ya kukondwa buzitu samu na beno na kuzenga nsuki ya beno mpe kusambila.

Beno ke tuba, “Mbote, kento fwana vwanda ya kufuka.” Mpe Biblia ke tuba ti “nsuki” ya yandi kele vwale ya yandi. Yimpu ve; nsuki ya yandi!

<sup>156</sup> Yinki kana Moïse tubaka, “Mu ke katula yimpu ya munu na kisika ya basapatu ya munu”? Ya zolaka simba ve. Nzambi tubaka “basapatu,” mpe Nzambi zolaka tuba basapatu.

Yandi tubaka “nsuki,” yimpu ve! Nkembo na Nzambi! Yandi ke zolaka yawu, mu ke ndima yawu. Lukumu na Nzambi! Yandi zola kaka kutuba yina Yandi ke tuba. Masonuku kele ve lutendulu ya muntu yandi mosi. Ya zola kutuba kaka ve samu na denomination ya beno; Ya zola kaka kutuba yina Yawu ke tuba, mpe Yandi kele mutendudi.

157 Beno ke tuba, “Mu zaba kento yina ke salaka yawu.” Mu ke kipe ve yina beno zaba. Mu zaba yina Nzambi me tuba na zulu ya yawu. Beno sungika beno mosi.

158 Kana bawu lendaka kaka kuzaba yina yawu kele, mama. Uh! Kana beno lendaka kaka kuzaba! To, “kento,” mama ve.

159 Mu monaka kidimbu mosi, na yina mu vwandaka katuka Blue Boar, kuna, mu banza ti ya kele na Bala-bala ya Tanu kuna, nganda mosi, ya vwanda tuba, “Bamesa samu na bamama.” Mu telamaka kaka kuna; mu tubaka, “Beno me vwandaka ata fyoti ve na mosi.” Mama ke kwenda kisika ya mutindu yina ve. Kento lendaka, kasi mama ve.

160 Beno me talaka, kubwa ya yinza bandaka na nkadulu ya kukondwa buzitu ya kento? Beno zaba ti ya ke suka mutindu mosi, kukondwa buzitu ya kento? Mpe yina, ke talisa dibuundu, kele kento? Dibundu kele kento, na nzonzolo ya kimpeve.

Mutindu mosi Kento ya makwela kele kento, na nzonzolo ya kimpeve.

161 Nkadulu ya kukondwa buzitu ya dibuundu, mutindu ya ke salamaka! Beno tala ba-vision, beno tala bima, beno mona ba-vision mpe yina Nzambi pesaka, mpe vision yina kele kieleka. Mu kele na Biblia ya munu na zulu ya ntima ya munu, samu na beno bantu yina ke kuwa na bande; bantu awa lenda mona yawu. Mu monaka yawu! Nzambi ya Ngolo nyonso zaba ti ya kele Kieleka. Ata mbala mosi ve zabaka yawu tii kaka ntangu yayi. Yandi yayi kele, “kinkonga, mpe zaba yawu ve.” Yandi vwanda kuzwa kaka ntangu mosi ya yandi ya nene. Beno bawu yayi.

Kasi ntangu ntwenya ya Kento ya makwela yina kwizaka na ntwala, ya vwandaka mutindu yankaka. “Alpha mpe Omega!” Uh-huh.

162 Dyabulu ke salaka yawu. Kasi mutindu ba-Juif ya ntama, ntangu bawu ke mona Ndinga . . .

Mpe Yesu tubaka na baya Yandi, Yandi tubaka yayi na bilandi ya Yandi, “Beno tala Masonuku. Beno, beno zaba, beno ke yangimisa samu na Munu mpe ministere ya Munu. Beno tala Masonuku. Na kati ya Yawu beno ke banza ti beno kele na Luzingu ya Seko, mpe Yawu ke pesa kimbangi ya Munu, Yawu ke tuba na beno yina kele Nsangu ya Munu. Kana beno lenda kwikila Munu ve, beno kwikila Bandinga yina Nzambi ke na kutendula na beno.”

163 “Beto ke vwanda ve na Muntu yayi samu na kuyala na zulu ya beto. Beto kele na banganga-Nzambi ya beto mosi, mpe nyonso yina.” Na yina beno kwenda na ntwala, ya kele nyonso yina lenda tubama. Ntangu me luta mingi, na mutindu nyonso. Beno me mona? Binkulu ya denomination yina ke tuba ti ya kele mbote, bawu ke kuwa yawu. Bawu ke zola kuwa to . . . Beno ke kwikila ndinga ya—ya muntu kulutila beno kwikila Ndinga ya Nzambi.

Bawu zaba ve. Mabuundu bubu yayi zaba ve Zole ya Timothée kapu 3. Kana beno . . .

<sup>164</sup> Mu ke mona bayankaka ya beno kusonika Masonuku. Ntangu yayi, yayi kele Masonuku mu ke na kutangaka kaka awa. Na yina, kana ya salama ti muntu kusonika yawu, to lomba munu ba-preuve na zulu ya yawu, mu lenda lakisa bawu Masonukwa samu na yawu. Beno me mona?

<sup>165</sup> Bawu zaba ve Zole ya Timothée kapu 3, kisika Yawu me tuba, “Na bilumbu ya nsuka, bantu ya lunangu, bantu ya munimi, bantu ke zolaka byese ya yinza kulutila Nzambi, bantu ke kuwaka makasi nswalu, bafundi ya luvunu, bantu yina ke kuwaka makasi ve, mpe bambeni ya bantu ya mbote (Kento ya makwela), beno me mona; ke lakisa mutindu ya kinzambi, kasi ke manga Ngolo ya yawu; kwenda ntama na bawu. Samu ti bayayi kele ya mutindu yina ke kwenda yinzo mosi na yinzo yankaka, mpe ke kuzwa bakento ya mayele mingi ve, bakento ya mayele mingi ve ya kunatama na bansatu ya mutindu nyonso, bayina ke longokaka ata fyoti ve to bayina ata fyoti ve lenda kwiza na luzabu ya Kieleka.” Ata fyoti ve! Bawu ke sala yawu ve, mpe bawu zola kusala yawu ve. Nzambi tubaka yawu.

Mpe, bampofu ya Pharisien, beno lenda mona yawu ve? Mu kele ya kudasuka ve; mu ke na kukotisaka kaka nsoso mpe ke na kukangaka yawu mbote. Mabuundu mpe ke na kuzabaka Yayi ve. Bakento lenda bakula yawu ve. Bawu zolaka . . . “Bakento ya mayele mingi ve, ya kunatama na bansatu ya mutindu nyonso,” Hollywood, mutindu nyonso yayi ya bima, kuzenga nsuki, kulwata bakupe, kupakula, mutindu nyonso yayi ya bima, yina kele ya kulunga ve. Beno zaba ti kento kele na kitini ya nene ya kubula na bilumbu ya nsuka?

<sup>166</sup> Beno zaba Biblia ke tuba, ti, “Bayina ke kima na kubasika na kitumbu ya nene yayi ke vwanda divala ya kitoko na ntwala ya Mfumu”? Kilumbu mu ke zonzila yawu, kana Mfumu zola, na zulu ya yawu, samu na beno bakento. Ti beno mona yina Nzambi ke banza samu na kento yina kieleka ke kima kitumbu ya kilumbu yayi. Yandi tubaka, “Yandi ke vwanda kitoko.”

<sup>167</sup> Mu kuwaka kento mosi, kilumbu yankaka yina, vwanda seka . . . Mwana-kento mosi, nkonga ya bakento ya kinkonga, na bankadulu ya kulutila yisi na—na yimbwa ya mama, yina vwanda seka kento mosi ya kukula na robe ya yinda. Beno kuwa awa, beno kento ya fyoti ya kidi-kidi, yandi kele na kima mosi yina beno zaba kima mosi ve na yawu. Yandi kele na nkadulu ya buzitu. Beno zaba mpe ve yinki kele nkumbu yina. Beno zimbisaka yawu na berceau, na kutala. Beno zaba mpe ve mbote na yimbi; yandi zaba. Yandi kele na kima ya kubumbama na kati ya ntima ya yandi yina beno zaba kima mosi ve na yawu. Beno zimbisaka yawu; beno lenda kuzwa yawu ata fyoti ve. Beno bokila ve yandi muntu ya mutindu ya ntama, mpe nyonso yina,

mutindu yina. Yandi zaba kima yina beno zaba kima mosi ve na zulu ya yawu. Yandi me bumbama na kati ya ntima ya yandi, kimvwama ya kulemvuka. Beno zaba mpova mosi ve na yawu. Mama ya beno me sansa beno mutindu yina. Pasteur ya beno pesaka yawu muswa; ya ke lakisa kisika yandi kele ya kutelama. Mu ke na kulongaka na zulu ya yandi kaka awa ntangu yayi. Beno me mona? Beno me mona kisika beno kele, mabuundu?

<sup>168</sup> Yesu tubaka, “Masonuku nyonso yayi fwana salama.” Mpe Yawu me lungisama.

<sup>169</sup> Beno tala, “Mutindu Jannès na Jambrès kuteleminaka mpe Moïse,” yandi ke kwiza kaka, bayankaka ya bawu. Ve, ntangu yayi, yandi ke na kuzonzilaka ve na ba-Methodiste, ba-Baptiste, awa; bawu kele na ngaanda ya tablo. Beno me mona? “Kasi mutindu Jannès na Jambrès kuteleminaka Moïse mpe Aaron, mutindu mosi bawu; muntu ya dibanza ya kubela ya kumanga yina me tala Kieleka,” me beba na ba-dogme mpe malongi ya dibuundu, na kisika ya Biblia.

Mpe na manima Jannès na Jambrès lendaka sala kima yina Moïse lendaka sala. Beno me mona, “mutindu Jambrès,” beno me mona mutindu mosi kuna?

“Mutindu Jannès na Jambrès kuteleminaka Moïse, mutindu mosi bantu yayi ya mabanza ya kubela ke manga yina me tala Kieleka, ke telemina Yawu,” ke vwanda na Yawu ve na kizunga ya bawu, ke sala mpe ve nyonso na Yawu, ke vwanda na kima ve ya kusala na Yawu. Kasi tubaka, “Bulawu ya bawu ke zabana.” Ntangu Kento ya makwela yina ke baka kisika ya Yandi mpe ke kwenda na mazulu, ba ke zaba yawu, beno vwanda na boma ve; mutindu Moïse, ntangu yandi bakaka bana ya Israel, mpe yandi basikaka na Egypte, mpe Egypte dyamaka. Mbote mingi.

<sup>170</sup> Yesu tubaka, “Masonuku nyonso me pesama na lutwadusu ya kimpeve, na yina Masonuku nyonso fwana lungisama.” Ntangu Yandi . . .

Ba yufulaka Yandi, bawu tubaka, “Nge ke kukisala Nge mosi Nzambi.”

<sup>171</sup> Yandi tubaka, “Beno, na musiku ya beno mosi, beno ke bokilaka bapofete yango bayina Ndinga ya Mfumu kwizaka, beno ke bokilaka bawu ‘banzambi,’ mpe bawu kele.” Yandi tubaka, “Na yina wapi mutindu beno lenda fundisa Munu ntangu Mu ke tuba Mu kele Mwana ya Nzambi? Masonuku nyonso yayi me pesama na kimpeve; nyonso ya Yawu fwana monisama, nyonso ya Yawu fwana lungisama.”

Beno me mona kuna, bawu kele kaka ya kufwa meso mingi, bawu vwandaka mingi ya kunatama na ndinga ya muntu na kisika ya kunatama na Ndinga ya Nzambi. Ya kele yina ke salaka bakento kusala yawu. Ya kele yina ke salaka milongi kusala yawu. Ba kele ya kunatama na bishop na kisika ya Yesu. Ba kele

ya kunatama na yawu, na ya bawu—na sake ya bawu ya mbongo, dibuundu ya nene.

<sup>172</sup> Beno tala kaka kana mu me zabana mingi. Beno baka bantu, ya Jeffersonville, na mwa kimvuka yina kele awa na Jeffersonville; beno baka bantu ya ngaanda, ya Jeffersonville, ya ngaanda ya tabernacle yayi na suka yayi, Mu zolaka ve kuzwa to kuzwa ndambu ya kumi na zole samu na kulonga. Yinki ya kele? Yandi kele ya kusala na lutangu ya bantu nyonso na yinsi; na New York, na Massachusetts, tii na Boston, na Maine, na Tennessee, na Georgie, na Alabama, mpe bisika nyonso na yinsi. Ba ke na kuvukanaka kintwadi. Amen! Ya kele yina Yandi tubaka. “Ya ke vwanda na Nsemo na ntangu ya nkokila.”

<sup>173</sup> Bawu lenda zaba ve Nsemo ya nkokila. Yawu yina dyambu. Yandi ke zaba Yawu kaka ve. Yandi kele ya kufwa meso mingi. Biblia ke tuba ti yandi vwandaka.

<sup>174</sup> Russie kuzwaka kaka kisika ya yandi na yinza, na science, kulutila ve pene ya bamvula makumi yiya me luta. Beno zaba, ntangu Mvita ya Ntete ya Yinza ya Yinza ya Mvimba kukwizaka, bawu ata mbala mosi ve. . . Bawu kipeke Russie ve. Mpangi Roy. . . Ya vwandaka kaka nkonga ya bantu yina vwandaka zaba kima ve, ba-Siberien ya nene ya ntama, na mandefo ya kifuluka na zulu ya kizizi ya bawu, mpe vwandaka zaba ve diboko ya kibakala mpe ya kikento. Ya kele kieleka, Russie, kasi yandi zabaka kisika ya yandi. Yandi zolaka sala yawu samu na kulungisa Masonuku. Beno zaba baprofesi ya munu ya yina mu tubaka ke salama, mutindu bawu nyonso ke vukana na kati ya communisme. Ntangu yayi yandi ke twadisa yinza na science. Beto kele ntama na manima ya yandi. Bayankaka nyonso ya yinza kele na manima ya yandi. Yandi ke twadisa kisika ya yandi. Yandi zabaka kaka ti yandi vwandaka na bayintu, mpe.

<sup>175</sup> Beno tala, muntu kele na ba-sense sambanu mosi yina yandi vwandaka na yawu mafunda sambanu ya bamvula me luta. Bamvula mafunda sambanu me luta, na ba-sense yina yandi vwandaka na yawu, yandi vwanda kota na ngwisani na yinzo ya yandi ya ntoto mpe vwanda sadila Nzambi. Mpe ntangu yayi, na bamvula makumi sambwadi na tanu yina me luta, muntu yina me katuka na kipusu ya mpunda, samu na astronaute. Samu na yinki? Yandi balukaka na lukwikilu ya yandi na Nzambi, mpe balulaka yawu na ba-sense ya yandi mpe balenda ya yandi na muntu moyo. Beno me talaka yawu? Yandi bikaka kusala kivuvu na Nzambi. Yandi ke tula kivuvu na yandi mosi.

<sup>176</sup> Mutindu kento yayi ya kukwikama ve. Yinki kele nkumbu ya yandi, na Washington kuna, yina sobisaka nyonso yayi? [Muntu mosi me tuba, “Murray.”—Mu.] Yinki kele nkumbu ya yandi? [“Murray.”] Murray, yandi tubaka, “Ntangu nyonso beto ke vwanda na basoda mpe marine, beto ke vwanda ve na nsatu ya Yehowa.” Uh-huh. Mu ke kipe ve yina beto kele na yawu.

Ya kele Yehowa to kima ve, samu na munu. Ti basoda mpe marine kudyama, mpe ya ke salama, kasi Yehowa ke vwanda ntangu nyonso. Ntangu nyonso yina mu kele ndambu ya Yandi, mpe mwana ya Yandi, mu ke vwanda na Yandi ntangu nyonso; ve na mbokolo ya munu to nsodolo ya munu, kasi na nsodolo ya Yandi. Amen, amen! Mu wvanda ve na kima ya kusala na yawu. Ya kele Yandi! Beno pesa munu Yandi to beno pesa munu lufwa. Ti bayinsi kutelama mpe kubwa; Yehowa ke vwanda kaka. Yandi me sala yawu, nzila nyonso ya bansungi; ntangu Rome kubwaka, ntangu Egypte kubwaka, mpe bayankaka nyonso kubwaka. Mpe Yandi kele kaka Yehowa. Oh, alleluia! Mu ke kumitala musambidi.

<sup>177</sup> Ya kele samu na yina Russie me zaba yina yandi mosi kele, yandi zolaka sala yawu. Kaka mutindu Israel zolaka kota na yinsi ya yandi. Nzambi zolaka vutula Israel na yinsi ya yandi, samu na Bampungu. Mpe mutindu mosi Nzambi zolaka nata Russie kuna, na communisme, samu na kusala kieleka yina tubamaka na profesi yandi ke sala.

<sup>178</sup> Muntu mpe ba-sense ya yandi sambanu kwizaka kaka, na kipusu ya mpunda, na kusalaka kivuvu na Nzambi. Na bamvula makumi sambwadi na tanu me luta, yandi bikaka na kutula kivuvu na Nzambi. Ntangu ba sonikaka musikya ya ngudi ya Etats-Unis yayi, ba tulaka Nzambi na nyonso yina ba salaka. Ntangu yayi bawu kele mpe ve na lukutakanu, mpe bawu ata mbala mosi ve ke tanguna Nkumbu ya Yandi. Ya kele kieleka. Ba ke tula ntima na bunene ya science ya bawu, bawu, na mutindu ya bawu ya kusala ya science; nkonga ya bantu ya mayuya. Ya kele kaka kieleka. Yinza ya muvimba kele ya kudyama na kukondwa ya kuzaba ya Biblia. Bi-...yinza ya muvimba me baluka na Nzambi.

Kasi, beno banza kaka, kaka kuna na kati-kati ya nyonso yina, mpe ba-denomination ya dibuundu mpe ba-seminere ya bawu ya bantu ya mayuya mpe nyonso, Nzambi me baka Ndinga ya bapofete ya Yandi mpe me zenga Kento ya makwela yina ke kwikila. Yandi tubaka ti Yandi ke sala yawu. Yandi me zenga kima yina Yandi silaka ti Yandi ke sala.

<sup>179</sup> Bawu ke tula ntima na mayele ya bawu ya kimuntu, na science ya bawu ya kimuntu, mpe nyonso yina; me bika Nzambi, na Yandi yina yandi tulaka kivuvu mbala mosi. Etats-Unis me bika Nzambi. Ba me basisa Yandi na lukolo, samu bana ya beto ya fyoti kuwa Yandi ve. Ba me basisa Yandi na lukolo. Ntangu yayi ba ke na kumeka na kukatula Yandi na zulu ya dollar, “Na Nzambi beto kele na kivuvu.” Bawu ke sila kukwikama na buzitu na yinsi na yisi ya dalapo mpe ke katula yawu, “Yinsi na yisi ya Nzambi.” Ba ke katula yawu.

<sup>180</sup> Beno me mona, bawu kwendaka na kulandaka bansatu ya bawu mosi mpe ba-sense ya bawu mosi. Samu, na bamvula

makumi sambwadi na tanu me luta, yandi sobaka ata fyoti ve na ba-sense ya yandi, yandi kele dyaka muntu mosi yina Nzambi vangaka yandi na mbandukulu.

Kasi, na bilumbu yayi ya nsuka, beno lenda zaba ve kisika beto kele? Mpe dibuundu me baluka, na Nzambi, na yina, na seminere mpe kimbangi, mpe nyonso yina, na kisika ya Ndinga. Ke zaba Yandi mpe ve na balukutakanu ya bawu, na balukolo ya bawu, to kima mosi ve, dyaka.

<sup>181</sup> Israel, na bamvula makumi zole na tanu me luta, zabaka ti kima mosi me nata bawu na yinsi ya bawu, mutindu ba silaka yawu. Bawu zabaka ve wapi mutindu ya salamaka. Bawu talaka mpasi mutindu kima nyonso, ba-martyr, na yisi ya Bampungu yina, kasi bawu kele na yinsi ya bawu. Bawu zaba ve samu na yinki.

<sup>182</sup> Samu na yinki Russie me vumbuka? Samu na yinki bayinsi me vumbuka? Samu na yinki muntu me lenda na kusala bima? Na ntangu bantu ya science, bankama tatu ya bamvula me luta, muntu mosi ya science ya France salaka balo kubaluka na mbangu na lweka mosi na zulu ya ntoto, mpe siamisaka, na nzila ya kusosa ya science, “Kana muntu mbala mosi kukwenda kieleka mbangu bakilometele makumi tanu na ngunga mosi, ngolo ya kubenda ke katula yandi na ntoto; landila kizitu ya yandi, landila kizitu ya balo.” Ntangu yayi yandi ke na kwendaka mafunda makumi zole na sambwadi ya ba-kilometre na ngunga mosi, beno me mona, yandi ke na kumeka dyaka na kumata. Yandi me zaba yawu kaka, ntama mingi ve. Samu na yinki? Ya fwana vwanda mutindu yina.

<sup>183</sup> Na yina, dibuundu vwandaka telama na zulu ya ditadi ya Yesu Klisto. Ata nyonso yina muntu nyonso tubaka, bawu vwandaka kaka na Ndinga yina, nsangu ya ngunga; Luther, Wesley, mpe nzila nyonso kuna. Mpe ntangu yayi bawu me vutuka na binkulu. Samu na yinki yawu me salama?

<sup>184</sup> Bamvula makumi zole na tanu me luta, Israel me zaba kaka ti bawu kele na yinsi ya bawu samu na kima mosi. Ya pesamaka na profesi ti ba fwana vwanda dyaka ya kuvukana; Osée tubaka mutindu yina. Beto me tanga yawu ntama mingi ve. Nzambi sadisa beto na kubakula yawu! Mbote mingi.

<sup>185</sup> Na ntangu kaka mosi, Kento ya makwela me zaba Nsemo ya nkokila, me banda kaka na kuzaba. Ba-pentecotiste ya nzala me banda na kuzaba ti ba-organisation ya bawu kele ve na bima yina bawu vwandaka sosa, ba kele mingi ya kubaluka mpe ya kukabwana. Beno me mona, ya kele ntangu ya kubakula, ya kubakula. Beno fwana zaba.

Yinza me zaba. Bayinsi me zaba. Science me zaba. Dyabulu me zaba ti ya kele ntangu yina yandi lendaka bebisa bakento, kubebisa dibuundu, kubebisa bantu. Yandi zaba yawu.

Mpe Nzambi me zaba ti ya kele na bantu na zulu ya ntoto yina Yandi zabaka na ntwala samu na Luzingu. Yandi zabaka ti yayi kele ntangu ya kutinda Nsangu ya Yandi. Yandi me sala yawu. Bantu me zaba Yawu, ntangu ya Kento ya makwela me bakula Nsemo ya nkokila.

<sup>186</sup> Kana Sodome zabaka bilumbu ya yandi, ntangu yandi monaka minati-nsangu yina kukwiza kuna, mutindu Billy Graham mpe Oral Roberts!

<sup>187</sup> Ntangu yayi, muntu mosi ya luvunu na Phoenix yandi telamaka kaka mpe tubaka...yandi bulaka kitini yina na bande, mpe tubaka Mu tubaka awa, mu “fwana botama na Nkumbu ya Yesu,” yandi tubaka yawu. Mpe na manima yandi tubaka, “Ntangu yayi beno me mona *awa*, awa yandi tubaka...” Ntangu mu vwandaka zonzila na yina me tadila Afrika, mutindu ba vwanda botikaka bambala tatu kizizi na ntwala, mpe na manima. Yandi tubaka ti mu tubaka, “Yina ke sala ata luswaswanu ve.” Beno me mona, yandi bulaka ata fyoti ve bande nyonso; kaka kitini yina, mpe zengaka yawu.

Yina, lenda vwanda kitumbu samu na boloko na kusalaka yina. Ba-bande yayi kele kieleka na muswa. Muntu mosi ve lenda sakana na yawu. Beno ke sala mbote na kusala yawu ve. Beno—beno—beno kele na musiku na zulu ya beno. Kasi beto ke sala yawu? Ve. Yandi tubaka, “Bika bawu.” Nzambi tubaka na munu yina ke salama. Beno tala kaka mbote, beno telemisa kaka meso ya beno na muntu yina. Beno me mona?

<sup>188</sup> Na ntangu mosi, Kento ya makwela me zaba Nsemo ya nkokila.

Kana Sodome zolaka zaba ngunga ya bawu!

<sup>189</sup> Ntangu yayi, muntu mosi yina tulaka bande, yandi tubaka, “Beno tala awa, samu na beno bantu ya Pentecote,” yandi tubaka, “mpe beno ba-Baptiste. Muntu yayi, profete ya luvunu, William Branham,” beno me mona, “tubaka ti Oral Roberts mpe Billy Graham vwandaka na Sodome.” Beno me mona, na manima me zenga bande; kaka yina, beno me mona.

Yandi lendaka ve kukwenda na ntwala na kutubaka, ti, “Bawu vwandaka minati-nsangu ya Sodome.” Na Sodome ve, “Bawu vwandaka kuna mutindu minati-nsangu ya Sodome.” Muntu nyonso zaba ti mu tubaka mutindu yina. Beno bula bande ya beno.

“Muntu nyonso yina ke katula to ke bwela, mutindu mosi ba ke katula na yandi.” Ya kele Ndinga ya Mfumu. Ya ke telama mutindu yina.

<sup>190</sup> “Kana Sodome zabaka munati-nsangu ya yandi, yandi zolaka vwanda ya kutelama bubu yayi,” Yesu tubaka, kana yandi zabaka mutindu mosi Abraham zabaka.



Abraham zabaka ti mwana ya nsilulu vwandaka kwiza. Kasi yandi zabaka ti ya zolaka wanda na nsobolo na mutindu mosi, samu ti yandi vwandaka kiboba mingi, mpe mutindu mosi vwandaka Sarah. Kasi ntangu yandi monaka Yandi Yina lendaka swasikisa mabanza ya Sarah, na manima ya Yandi, yandi zabaka ngunga yina yandi vwandaka zinga. Yandi tubaka, “Mfumu ya munu, bika mu kwenda baka mwa maza awa mpe kusukula makulu ya Nge.” Ba kudyaka kitini ya dimpa. “Bika mu sambila Nge, vingila fyoti,” beno me mona, awa, “M-f-u-m-u ya munu,” na kisono ya nene M-f-u-m-u, “Elohim.” Yandi zabaka ti Nzambi vwandaka zonga na yandi na nzutu ya muntu. Yandi zabaka kidimbu ya yandi, mpe Mfumu sakumunaka yandi.

Sodome zabaka ve kilumbu ya bawu, mpe ba yokaka yawu na tiya. Yesu tubaka, “Mutindu ya vwandaka na kilumbu yina, mutindu mosi ya ke vwanda ntangu Mwana ya Nzambi ke . . . to Mwana ya muntu ke monisama.”

<sup>191</sup> Ntangu yayi, dibuundu me zaba ve kilumbu ya yandi. Mutindu Israel, yina ba kwikaka na kuvutuka na Palestine, ba ke pusa yandi na ngolo na kukota na Lukutakanu ya Yinza ya Mabuundu. Samu na yinki? Yandi zabaka ve ngunga ya yandi. “Bantu, beno basika na yandi, beno kota ve na disumu ya yandi!” Beno tina, samu na luzingu ya beno, to ba ke kanga beno na kidimbu ya kibulu mpe beno ke lenda ve kusala kima yankaka samu na yawu.

“Ti yandi yina kele dyaka mvindu kuvwanda dyaka mvindu. Ti yandi yina kele santu,” ve *ke vwanda* santu, “santu ntangu yayi. Ti yandi yina kele santu,” ve ya . . . bakento ya bansuki ya kuzenga; yandi lenda vwanda ve. Ntangu yayi, yina ke wakana ngolo mingi, kasi ya kele Masonuku. Biblia ke tuba, “Yandi ke kondwa buzitu na yintu ya yandi,” mpe yintu ya yandi kele bakala ya yandi. Yintu ya Yandi kele Klisto, na yawu yandi ke kondwaka Klisto. Wapi mutindu yandi lenda vwanda “kukondwa buzitu” mpe kuvwanda ve “mvindu”? “Ti yandi yina kele na nsuki ya kuzenga kulandila. Ti yandi, kento yina ke lwataka bakupe kulandila na kulwata bakupe. Ti yandi yina ke mangaka Ndinga kulandila kumanga Yawu.”

“Kasi ti yandi yina kele santu kuvwanda dyaka santu. Ti yandi yina kele ya kusungama kuvwanda dyaka ya kusungama; Ndinga ya kusungama ya Nzambi, Mwana ya Nzambi yina me monisama. Beno vwanda dyaka santu, ya kusungama dyaka!” Beno zaba! Yinga, tata! Bilumbu ve . . .

Dibuundu me zaba ve kilumbu ya yandi.

<sup>192</sup> Mutindu Israel, kuna na yinsi ya yandi ya nsilulu, yandi zaba ve mutindu yandi vutukaka kuna. Ba vutulaka yandi kaka mbala mosi kuna. Samu na yinki? Ngolo ya bayinsi kotisaka yandi na kisika ya yandi.

Ntangu yayi mu ke tuba kima. Ngolo ya bayinsi kotisaka Israel na yinsi ya yandi; ngolo ya bayinsi ke kotisa dibuundu na Lukutakanu ya Yinza ya Mabuundu; kasi ngolo ya Nzambi ke tula bantu na kati ya Kento ya makwela. Yinza ke pusa nzila *yayi*, mpe yinza ke pusa nzila *yina*, kasi Nzambi ke pusa na zulu. Mpeve ya Nzambi, yina kele Ndinga ya Nzambi, “Ndinga ya Munu kele Mpeve mpe Luzingu,” ke tula Kento ya makwela na kati ya kisika ya Yandi. Samu, Yandi ke zaba kisika ya Yandi na kati ya Ndinga, na yina Yandi kele na kati ya Klisto, ke tula Yandi na kati ya kisika ya Yandi. Ngolo ve ya bayinsi ke sala yawu. Kasi ngolo ya bayinsi kotisaka Israel na yinsi ya bawu; mangolo ya bayinsi ya Lukutakanu ya Mabuundu ke kotisa konso organisation na kati ya yawu; kasi Ngolo ya Nzambi ke vumbula Kento ya makwela na Nkembo, na ngaanda ya yawu.

<sup>193</sup> Oh, bantu, beno zaba kilumbu ya beno, mutindu Yesu kebisaka beno; kidimbu ya Sodome, mpe kondisyo ya dibuundu ya kilumbu yayi.

<sup>194</sup> Beno tala yina Yandi tubaka na kilumbu yayi ke salama. Beno kuwa yawu kieleka mbote. Kidimbu ya Sodome ke salama na kilumbu yayi; kidimbu mutindu Abraham, kilumbu yina na ntwala ya Sodome, yina ba bokilaka na kubasika. Bima yayi nyonso yina ba pesaka profesu, ke salama ntangu yayi. Beno tala mbote kilumbu beno ke na kuzinga. Beto me zonzila yawu mpe me zonzila yawu.

<sup>195</sup> Ntangu yayi Yandi silaka na kutinda beno Nsemo ya Mazulu, samu na kuyelisa Ndinga Nkuna yina ba ke kuna samu na kilumbu yayi. Nkuna kele na kati ya *Awa*. Nkuna kele Biblia. Samu na yinki? Yesu tubaka mutindu yina. “Ndinga kele Nkuna yina mukuni kunaka.”

Mpe, ntangu yayi, na ntwala beno kuzwa mbuma mosi, ata ti beno me kuna nkuna, ya fwana vwanda na nsemo samu na kuyelisa nkuna yina, to yawu ke pola mpe ke sala ata mbote ve; yawu ke kufwa. Kasi kana ya kele na nkuna na kati ya ntoto, na mutindu ya kulunga ya ntoto, na mutindu ya kulunga ya nsemo ya mwini na zulu ya yawu, ya fwana kuyela.

Mpe Yandi silaka ti na bilumbu ya nsuka, na ntangu ya nkokila, Mwana ke basika samu na kuyelisa Nkuna yina. Ba me longa Nkuna. Mwana ya Nzambi ke na kuyelisaka Nkuna yango, na kusiamisaka Yawu, na kusalaka Yawu kupusa na ntwala ya beno mpe na kusiamisaka ti Yawu kele kieleka. Beno me bakula yawu? Beno zaba kilumbu ya beno.

Mu ke na kumanisaka ntangu yayi. Ya me kuma ntangu yayi ntangu ya kumanisa.

<sup>196</sup> Mpe bantu ya bimvwama, ya kufwa meso, ya kulongoka ya Laodicée ke basisa Ndinga na kati-kati ya bawu. Ba me sala yawu? Yandi tubaka ti ba ke sala yawu.

Mutindu baprofete ya ntama ba fidisaka bawu samu na kusiamisa Ndinga ya nsilulu ya kilumbu ya bawu, samu ti bantu yina ba soolaka ntete, na kilumbu ya bawu, kumona Yawu. Mutindu kento na dibulu ya maza, mutindu Nathan, mutindu mpofu Bartimée, mutindu Pierre, mpe bayankaka ya bawu bayina zabaka Yawu. Yandi vwandaka Ndinga yina. Mpe yina basikaka, “Kana Mu ke sala ve bisalu yina Tata silaka Mu ke sala, na yina beno kwikila na Munu ve. Kasi kana Mu ke sala bisalu, ata ti beno ke kwikila Munu ve, beno kwikila bisalu ya bawu. Ba ke tuba na beno Nani Mu kele.” Beno me bakula yawu? Mbote mingi, beno kondwa ve kilumbu yina, ba me fidisa. Babakala mpe bakento ya bilumbu yankaka zabaka Yawu, mpe bawu kotaka mpe bawu vwandaka na lukengolo.

<sup>197</sup> Ba-Pentecotiste, oh, la la, samu na yinki beno lenda zaba ve kilumbu ya beno? Beno zaba kilumbu ya ntangu ya nkokila. Ya kele awa, mpe ya kele awa, ti, samu na kusiamisa nkwizulu ya Klisto, samu na kusiamisa yawu. Beto me kuma na nsuka. Beno zaba kilumbu ya beno.

<sup>198</sup> Mu zaba ti mu me baka beno ntangu ya yinda. Ya me kuma ngunga kumi na zole ntangu yayi. Kasi, mu ke zolaka Madya yayi, Yayi kele Luzingu. Ya kele. Ya kele, samu na mukwikidi. Beno zaba kilumbu yina beno ke na kuzinga, mpe kidimbu ya ntangu.

<sup>199</sup> Beno me mona kisika nyonso kele: Israël; kisika dibuundu; kisika kukondwa buzitu; kisika Kento ya makwela kele ya kutelama. Yinki me bikana? Kima yina ke landa, kubakama ya Kento ya makwela. Ya kieleka, konso dibuundu ke na kusosaka kima ya nene. Pentecote ke tuba, “Nkembo na Nzambi! Ya kele na kilumbu ke na kwiza yina bawu ke sala *yayi*, mpe bawu ke sala *yina*.” Beno me mona, bawu kele bantu yina ke tubaka. Bawu ke kwikilaka.

<sup>200</sup> Mutindu, kilumbu mosi, Caïphe tubaka, “Ya kele mbote ve ti muntu mosi kufwa, mpe ve yinsi ya muvimba kufwa?” Yandi vwandaka nganga-Nzambi ya ntete, Biblia ke tuba, ya kele samu na yina yandi tubaka yawu. Yandi pesaka profesu, na kuzabaka ve yina yandi vwandaka tuba. Kasi yandi zabaka kieleka ya yawu, ti yandi vwandaka pesa na munkayulu Nzambi ya kieleka yina yandi tubaka ti yandi vwandaka nganga-Nzambi ya ntete?

Mutindu mosi ya kele, bubu yayi! Ba ke na kuingila, kuna kisika mosi, na ntangu ya nene na kukwiza.

<sup>201</sup> Na yina, mu ke kwenda na lukutakanu ya Bantu ya Mumbungu na bawu. Ba ke tuba, “Nkembo na Nzambi!” Milongi yina ke telama mpe ke ningisa kaka bantu, mpe ke tuba, “Reveil ya nene ke na kwiza. Diboko ya Mfumu ke vwanda na zulu ya ntoto!” Mpe mutindu bantu ke na kukwenda na ntuala, ke na kutambula mutindu. . . Mpe ke na kubakula ve ti ya kele na yisi ya Bampungi samu na Israel. Samu na yinki bawu ke sala yawu?

Ya kele samu ti bawu kele bantu yina ke tubaka ti bawu kele Baklisto, mpe bawu ke bakula ve. To dyaka Caiphe kubakulaka yina yandi vwandaka sala. Mpe bawu zaba ve ti bawu ke na kumangaka Nsangu ya kieleka yina ba me tinda na bawu. Amen!

<sup>202</sup> Konso kitini ya Masonuku, beto me tala yawu kilumbu na manima ya kilumbu, mpe lumingu na manima ya lumingu, tii ya kele kukondwa ntembe ti ya kele Kieleka. “Kana mpofo lenda ndima Yawu ve,” Yesu tubaka, “beno bika bawu. Kana mpofo ke twadisa mpofo, bawu nyonso ke kubwa na dibulu.” Mu zaba ve ntangu, mu zaba ve wapi kisika, kasi mu zaba ti ya ke na kwiza.

<sup>203</sup> Beno zaba, mu ke mona samu na yinki Satana zolaka ve ti mu sala yayi. Mazono, mu kuwaka yimbi mingi. Mu lendaka ve kuzwa Ndinga mosi ya Mfumu. Mu salaka nyonso mutindu mu zabaka kusala, mpe mu lendaka ve. Mpe na suka yayi, ntangu mu vumbukaka. . . Mu kudyaka mwa masangu, mazono, mpe ya monanaka ti ya vwandaka kaka kuna na kifundu ya munu. Mu vwandaka ya kubela mingi, mu kaka—na mpasi mu vwanda lenda kaka yawu ve. Mu banzaka, “Yinki kele dyambu? Mu ke na kwenda kuna, mpe mu zaba ve yina mu ke tuba. Mpe, Mfumu, mu ke na kuzwa ve Disonukwa na dibanza ya munu, na kusonika. Mu ke na kuzwa kima mosi ve.” Mu vwanda zaba kaka ve yinki kusala.

Na yina, na manima Nsangu me banda na kukwiza na munu, Satana landilaka na kutuba, “Nge ke na kuwa mpasi mingi. Yintu ya nge ke na kusalaka mpasi. Nge kele ya kubela. Nge lenda kwenda kuna ve. Nge lenda ve kutelama kuna. Ya ke vwanda *yayi*, ke vwanda *yina*.”

<sup>204</sup> Mu ke bambuka moyo, kilumbu mosi, na disolo mosi ya mwa ntwenya ya bakala na Angleterre. Yandi vwandaka kaka muntu mutindu bantu nyonso. Mpe bawu tubaka ti ntinu, mosi ya bantinu na bilumbu ya ntete vwandaka kwenda na yinzo ya yandi—ya yandi ya kimfumu. Mpe, yayi, yandi vwandaka ve na muntu. . . Yandi vwandaka na nsangu yina yandi zolaka pesa, nsangu ya nswalu, samu na mbeni. Mpe na yawu yandi—yandi—yandi tubaka na mwa muntu yayi ya kutelama kuna, yandi tubaka, “Tala, baka nsangu yayi, baka nsangu yayi! Kwenda nswalu na kisika *yayi—yayi*, mpe tuma ti *yayi* kusalama.” Mpe yandi tubaka, “Baka nkawa ya munu na diboko ya nge. Yina ke pesa kimbangi ya nge, ti mu kele. . . me tinda nge.”

<sup>205</sup> Mpe yandi tulaka yawu na yisi ya mvwela ya yandi, mpe yandi kwendaka. Mikengi bisika nyonso vwanda kanga yandi, muntu nyonso yankaka. Yandi vwanda boka, “Beni lutisa! Mu kele na nsangu ya ntinu.” Amen. “Mu kele munati-nsangu ya ntinu,” ndinga yina me siamisama.

<sup>206</sup> Mu banzaka, “Satana, katuka na nzila ya munu! Mu kele na Nsangu ya Ntinu. Mu fwana kwenda.”

207 Kilumbu mosi ntangu bawu kufwaka Mwana ya ntinu ya Ngemba, mpe tulaka Yandi na ntoni, mpe tulaka kidimbu na ntoni, mpe lufwa simbaka Yandi bilumbu tatu mpe bampimpa tatu. Kasi na suka ya Paki Yandi vwandaka na nkawa na diboko ya Yandi, mpe bokaka, “Katuka na nzila, lufwa! Katuka na nzila, ntoni! Zibuka! Mu kele Nsangu ya Ntinu. Mu fwana basika na kusiamisa mvumbukulu yayi. Mu kele mvumbukulu mpe Luzingu.” Alleluya! Mu ke na kuwa kieleka mbote ntangu yayi.

Ya kele Nsangu ya Ntinu. Ti beto kuzaba Yawu, bankundi, samu ti ba me bokila beto na kuvukana kintwadi samu na muningi ya Mpungi. “Samu ti Mpungi ya Mfumu ke wakana, kuna ntangu ke vwanda dyaka ve.”

208 Yandi me vukisa kintwadi Israel. Bilumbu tatu, na kilumbu ya tatu Yandi tubaka ti Yandi ke sala yawu. Bamvula makumi zole na sambwadi me luta. Na kilumbu yina ya tatu Yandi tubaka ti Yandi ke vukisa bawu kintwadi, mpe Yandi me sala yawu. Yandi tubaka ti Yandi ke sala kuzabana nzila ya Luzingu. Beno bawu yayi, ke na kuingilaka kaka ntangu yayi samu na Kento ya makwela na kubasika na nzila samu bawu kwiza, baprofete zole, Baprofete Hébreux, bawu ke zaba bawu.

209 Beno ke bambuka moyo na munu ya kutelama na Caire, samu na kukwenda kuna, ntangu Lewi Pethrus tubaka, “Mpangi Branham, kana bawu lenda mona yawu. . . Bawu ke kwikilaka na baprofete ya bawu.”

210 Mu tubaka, “Ya kele kima ya mbote samu na munu.” Beno me mona mutindu muntu kele? Kasi beno ke mona lemvo ya Nzambi? Mu tubaka, “Mu ke tanga Ngwisani ya Malu-malu yayi.” Ba tangaka Yawu. Lewi fidisaka bawu yawu, kulutila fuku mosi, kuna, Mpangi Lewi Pethrus ya Suède. Ba zola tanga Yawu, ke mata mpe ke kulumuka kuna, ba-Juif yayi; ve mutindu nkonga ya ba-Juif ya bilumbu yayi, kasi na yinsi ya bawu. Mpe yandi kwizaka, yandi tubaka, “Kana yayi kele Mesiya, bika beto mona yandi kusala kidimbu ya profete, beto ke kwikila yawu.”

211 Lewi Pethrus tubaka, “Mpangi Branham, ya kele bweso. Ya kele bweso.” Muntu mosi tubaka na munu ti—ti ya ke vwanda bweso. Mu kwendaka kaka, kaka mbala mosi kuna.

Muntu mosi kwizaka kuna mpe vwandaka kuna, Mpangi Arganbright, yandi tubaka, “Mpangi Branham, yina ke bula kaka ngunga na Israel! Nata bawu na ntwala ya Yawu, mpe talisa kidimbu ya profete. Bawu ke kwikila yawu.”

212 Mu tubaka, “Mfumu, munu yandi yayi, me kubama.” Mu dumukaka na mpepo; mu bakaka mbongo mpe sumbaka ticket; telamaka na Caire. Mu tubaka, “Yinga, mu me kubama.”

213 Mpeve-Santu tubaka, “Yayi kele ve kisika ya nge. Yayi kele ve ntangu ya nge.” Beno me mona, beto ke salaka mambu kusalama na nswalu. Mu banzaka, “Oh, la la! Mu me kwiza tii awa; mu ke—mu ke kwenda.”

<sup>214</sup> Kima mosi tubaka, “Telama kaka awa! Kukwenda lweka yina ve. Baluka kwenda na Inde. Kukwenda kuna ve. Kwenda na Inde, kasi kukwenda awa ve.”

<sup>215</sup> Mu banzaka, “Samu na yinki?” Na yina mu kwendaka na manima ya hangar, mu tubaka, “Mfumu Yesu, yinki yayi zola kutuba?”

Na yina Yandi monisaka munu. “Muntu ya makanda ve. Baprofete yayi kele bayina.” Ya fwana vwanda landila Masonuku. “Moise na Elie fwana kwiza.” Mpe, na ngaanda ya yina, ba me katula ntete ve Kento ya makwela na nzila. “Mpe baprofete yina ke vutuka mpe bawu ke sala kidimbu ya profete.” Yina kele Masonuku. Ya kele kuna nyonso ke salama na ntangu yina, na mutindu ya kulunga, Israel mutindu yinsi ke butuka na kilumbu mosi. Amen! Bansemo ya nkokila ke na kulezima!

Ya ke vwanda na Nsemo na ntangu ya nkokila,  
 Beno ke mona kieleka nzila ya Nkembo;  
 Na nzila ya maza, kele Nsemo bubu yayi,  
 Luzikulu na Nkumbu ya ntalu ya Yesu.  
 Ntwenya mpe kuluntu, beno balula ntima na  
 masumu ya beno nyonso,  
 Mpeve-Santu kieleka ke kota;  
 Bansemo ya nkokila me kwiza,  
 Ya kele dyambu ti Nzambi mpe Klisto kele  
 Mosi.

<sup>216</sup> Beto me kuma na ntangu ya nsuka, nkundi. Mpe na yina beto ke banza na nkunga yayi ya musoniki na kimpeve, na ntangu yandi tubaka:

Bayinsi ke na kupanzana, (Yayi ke na  
 bamvula kumi na tanu me luta.) Israel ke  
 na kuvumbuka,  
 Bidimbu yina baprofete zabisaka na ntwala;  
 Ba ke na kutanga bilumbu ya Bantu ya  
 makanda, (Beno tala mvindu ya yandi ntangu  
 yayi.) ba me fuluka na boma;  
 “Vutuka, O nge yina me zimbana, na yina ya  
 nge.”

Kilumbu ya mpulusu me belama,  
 Bantima ya bantu me fuluka na boma;  
 Beno vwanda ya kifuluka na Mpeve ya  
 Nzambi, minda ya beno ya kukubika mpe ke  
 sema,  
 Beno tala na zulu! Mpulusu ya beno me  
 belama. (Ya kele kieleka.)

Baprofete ya luvunu ke na kuvunaka, ba ke  
 na kumanga Kieleka ya Nzambi, (Ya kele  
 kieleka ve?)

Yesu Klisto kele Nzambi ya beto.

Ba ke kwikilaka Yawu ve. Ba kele na mitindu nyonso ya ba-isme mpe bima!...?...kieleka. Kasi profete tubaka, to, musoniki na kimpeve tubaka:

Beto ke tambula kisika bantumwa tambulaka.

217 Beno bambuka moyo na vision ya munu? Mu tubaka, “Kana bantu ya Paul ke kota, mutindu mosi baya munu, samu ti mu me sala kaka mutindu yandi salaka.” Mu ke vwanda kaka na Yawu.

Mafuku ya bawu losaka maboko ya bawu, na kutubaka, “Beto ke na kupema na zulu ya yawu!”

Yinki? Kuzaba kilumbu yina beto ke na kuzinga, ntangu beto ke na kuzinga, kidimbu ya ntangu yina beto ke na kuzinga. Ntangu lendaka kwenda ntama kulutila yina beto ke banza. Mosi ya bilumbu yayi, bika ti yandi yina kele na ngaanda kuvwanda dyaka. Yandi yina kele na kati fwana vwanda ntangu nyonso na kati dyaka. Mwelo ke kangama.

218 Kana ya kele na bayankaka awa na suka yayi yina me kota ntete ve, oh, na Nkumbu ya Yesu, bantu ya munu ya luzolo. . .

Beno tala ve na kisadi yayi yina zaba kima ve ya kutelama awa, yina longokaka ve, yina longokaka mingi ve, yina ya kukondwa ndongosolo; beno tala na yawu ve. Kasi beno tala Ndinga yina me siamiasama. Beno tala na Mpeve-Santu ya nene Yina ke siamisa ti Yawu kele Kieleka. Beto kele na ntangu ya nkokila. Ntangu me luta kulutila yina beno ke banza. Ve. . .

219 Bakento, beno bika bansuki ya beno kukula. Mpangi-kento, na lemvo ya beno beno katula bilele yina ya mvindu. Beno losa makaya yina. Samu ti ngunga ke na kwiza, yina, “Yandi yina kele mvindu, ti yandi vwanda dyaka mvindu; mpe yandi yina kele ya kusungama, ti yandi vwanda dyaka ya kusungama. Yandi yina kele na kati kele na kati; yandi yina kele na ngaanda kele na ngaanda.” Mwa, nzila ya fyoti, “Kana muntu ya kusungama ke kuzwa mpulusu na mpasi, wapi mutindu samu na musumuki mpe muntu ya yimbi,” muntu yina ke mangaka Kieleka, beno zaba, “wapi kisika bawu ke vwanda?”

Beto kulumusa bayintu ya beto.

220 Ntangu yayi, na Nsemo ya ngunga yayi yina beto ke na kuzingaka ntangu yayi, Nsemo ya kilumbu yina beto ke na kuzingaka ntangu yayi; beno bankundi ya ntalu mpe ya luzolo, beno bayina me katuka na ba-etat ya yankaka na yinsi ya muvimba, ti beto ntangu yayi, mpe munu na beno, na autel yayi, beto fyongonina. Wapi mutindu Mpeve ya Nzambi kele na kati ya bantima ya beto bubu yayi? Beno bambuka moyo, ya kele Mpeve yina, ya kukondwa kubedisa, ya kukondwa kubebisa; malongi nyonso ya dibuundu, mpe nyonso, me zimbana ya muvimba.

221 Beno ke meka ve na kubwela na Yawu to kukatula na Yawu. Samu ti, kana beno meka na kutula ntendulu na Yawu, beno mosi, ba ke katula ndambu ya beno na Buku ya Luzingu. Beno

ke na kumeka na kutuba kima yina Mpeve me tuba ve? Beno ke na kumeka na kusala ti Yawu kuwakana mutindu Yawu me tuba kima? To, beno baka kaka Yawu kieleka yina Yawu tubaka, mpe kubika Yawu mutindu yina? Beno ke na kuvukisa bitini, ke na kuzenga, babande, ke na kusalaka bima yina kele mbote ve? Beno me sala yawu?

<sup>222</sup> Yandi tubaka, “Mbote, mu ke na kuwa kaka ve mutindu ya kusala mutindu mu zolaka sala *yayi*. To, ya lendaka vwanda, mu—mu—mu zaba ti dibuundu ya munu ke kwikilaka Yawu ve. ‘Ya kele kaka ndinga ya muntu mosi samu na Yawu.’”

Muntu yina kele Nzambi. Biblia me tuba ti beno fwana zenga ve bansuki ya beno. Yayi. . . Biblia me tuba yawu. “Ya ke salama ti bakento yina ke lwata bilele mutindu babakala, mpe wapi mutindu ba ke vwanda busafu samu na Nzambi.” Mutindu Mpeve-Santu zonzilaka na yawu, vaze yayi ya kulemvuka, ya kukondwa kulunga yina salamaka kaka na kutelama kuna na nsungi yina Ntinu ya nene tubaka, “Awa kele ntoni ya Munu, Ndinga ya Munu.” (“Awa kele Nkawa ya Munu,” mu zolaka tuba.) “Baka Nkawa ya Munu, mpe kwenda na ntwala, mpe nata Nsangu.”

<sup>223</sup> Mu zaba ti ba-denomination me meka na kukanga Yawu, mpe kubasisa Yawu, mpe kubasisa Yawu, mpe kulosa Yawu na ngaanda, mpe nyonso yina. Kasi, na lemvo ya Nzambi, mu kele na nzila ya munu, ke boka katuka yinsi na yinsi yankaka, na kisika na kisika yankaka, na dibuundu na dibuundu yankaka, “Beno basika na yawu!” Ya kele ya kuzabana ve, kasi Yawu kele Kieleka.

<sup>224</sup> Beno ke kuzwa Yawu na—na Mpeve yina Yawu sonamaka? Beno ke kuzwa Yawu na Mpeve yina Yawu me pesama? Kana beno me kuzwa ntete ve. . . Beto kele ve na kisika samu na autel; ntima ya beno kele autel. Beno zola kutelemisa diboko ya beno, kutuba, “Nzambi, tala munu kyadi. Bika ti Mpeve ya Nzambi kukota na munu, kufundisa munu ntangu yayi na masumu ya munu nyonso, mpe bakidi-kidi, bifu ya munu nyonso ya yimbi, mpe kudasuka ya munu ya nene, mpe kuswana, mpe kunwana, mpe yinwa, mpe yina nyonso mu wandaka na yawu. Mpe mu zaba kima mosi, ti mpeve ya munu kele ve ya lembami samu na Mazulu. Kumisa munu ya lembami, Mfumu, na ntangu yayi ya nsuka. Yayi lendaka vwanda dilongi ya nsuka yina mu ke kuwa. Yayi lendaka vwanda mbala ya nsuka yina mu ke kuwa Nsangu. Mu me telemisa diboko ya munu. Nzambi, tala munu kyadi.”

<sup>225</sup> Nzambi sakumuna beno. Kumi na zole ya maboko. Ntangu yayi, kaka samu na mwa ntangu fyoti ya kisambu ya swi samu na beno. Beno bayina me telemisa diboko ya beno, ya ke lakisa ti beno ke zola dyaka. Ya ke monana na munu mutindu ti Mpeve ke na kubokila dyaka muntu mosi.



<sup>226</sup> Nzambi ya luzolo, Nge Yina zaba bima nyonso. Mpe Nge salaka bima nyonso samu na lukanu ya bima nyonso, samu ti, bayankaka fwana vwanda ya kufundisa, bayankaka fwana vwanda ya kufwa meso; bayankaka, “mutindu kisadi-banzungu yina salaka nzungu,” mutindu Paul tubaka, “mosi samu na lukumu mpe yankaka samu na lukumu ve.” Yina vwandaka ya lukumu ve, vwandaka samu na kulakisa yina ba zolaka pesa lukumu. Kasi ya kele ve na diboko ya Kisadi-banzungu na kusala yina Yandi zola? Ya kele ve na dikani ya ntete ya Nzambi, na kubokila? “Yina Yandi zabaka na ntwala, Yandi me bokila bawu. Bayina Yandi bokilaka, Yandi nungisaka. Mpe bayina Yandi nungisaka, Yandi me kembisa.”

<sup>227</sup> Ya lendaka vwanda bayankaka na kati ya bawu awa bubu yayi kele mutindu mwa kento yina na dibulu ya maza, na kati ya mvindu, na kati ya kukondwa lukwikilu, na kati ya binkulu ya muntu, na malongi yina muntu me salama. Ya lendaka vwanda mbala ya ntete bawu kuwaka bima yayi, kasi kima mosi ya ngitukulu kebisaka bantima ya bawu. Ya kele na maboko mingi, maboko mingi me telama, Mfumu. Ti Kisadi-banzungu ya nene kubaka nzungu yina ntangu yayi mpe kuyidika yawu nzungu ya lukumu. Mu ke kwikila ti ya kele na kikuma mosi, Mfumu, to ba zolaka sala yawu ve, ba zolaka tuba yawu ve. Mu ke kwikila dyaka, mu ke na kusimbaka samu bawu.

<sup>228</sup> Bika kisadi ya Nge ya kulemvuka kulomba, Mfumu. Bika beto lomba samu na bawu, mutindu muntu yina kele na kati-kati ya bantu ya moyo mpe ya kufwa; mutindu mosi yina na Sodome vwandaka lomba samu na bantu ya Sodome, “Beno basika na yawu! Beno basika na yawu, na nswalu nyonso!”

<sup>229</sup> Ti bawu kwiza, Mfumu, na kulemvuka mpe na lembami na kiti ya kimfumu ya Nzambi ntangu yayi, na ntima ya bawu, na kutubaka, “Yesu, kubanda, bubu yayi, Nge ke vwanda ya munu. Mu ke pesa nsilulu yayi na Nge ntangu yayi awa, na yina mu me vwanda awa na kiti yayi kisika Mpeve ya Nge me bula munu. Kana Yawu me bula munu awa, mu fwana kwenda ntama mingi ve kulutila yayi awa. Kaka awa kele kisika Nge me kutana na munu; kaka awa kele kisika beto ke sukisa yawu; kaka awa na kiti ya zole yayi, na kiti ya tatu yayi, na kiti ya tanu yayi, kisika nyonso yina ya kele. Kaka awa kele kisika yina yawu ke vwanda, samu ti awa kele kisika Nge me fundisa munu, awa kele kisika Nge me sila na kusungika yawu. Samu ti ata ti mu ke lendaka vwanda yimbi mpe mvindu, mu ke kuma mpembe mutindu mvula ya mpembe. Mu ke kwikila Ndinga ya Nge nyonso. Mu me kubama na kutambula na kati ya Yawu, kukwikila Yawu, kundima Yawu.

“Mpe ntangu yayi mu ke sala yayi samu na nkembo ya Nzambi, na kuzabaka ti luzingu ya munu kele mbote ve samu na munu, ya kele mbote ve samu na Nzambi, ya kele mbote ve samu na bankalani ya munu, ya kele mbote ve samu na kima

nyonso yankaka; kaka mpamba mbote samu na dyabulu, samu na kusala kisakininu na munu, samu na kulosa munu bisika nyonso, ya lendaka vwanda zuwe ya bakala mosi samu na kutala, ya lendaka vwanda kiteki ya kento mosi. Nzambi, sala munu kisadi samu na Nge.” Pesa yawu, Mfumu. Mu me pesa bawu na Nge ntangu yayi, na Nkumbu ya Yesu Klisto, Mwana ya Nge.

Na bayintu ya beto ya kuyinika, mpe bantima ya beto.

Mu lenda kuwa Mvulusi ya munu . . .

Nkundi ya munu, ya kieleka. Ya lendaka vwanda ntangu ya beno ya nsuka. Beno lenda kuwa Ndinga yina ya fyoti?

. . . bokila,

Mu lenda . . .

Yinki Yandi ke bokila- . . . ? Yinki ke na kubokila beno, kana Mvulusi ya beno kele? Ndinga.

. . . Mvulusi ke bokila,

Yinki beno fwana sala? Kumanga yinza.

Mpe baka kulunsi ya munu mpe landa,  
landa . . .

“Mu me bebisa mbotika na Nkumbu ya Yesu, Mfumu.”

Mu ke kwenda na Yandi na nsaba,

Mu ke kwenda . . .

Na Yandi, wapi kisika? Na nzila ya maza, na nzila ya nsaba, na nzila ya kisika nyonso; yinzo ya bisambu, na bandonga ya nene ya maza, bisika nyonso. Beno baka lukana ya yawu!

. . . kwenda na Yandi na nsaba,

Mu ke kwenda na Yandi, na Yandi tii na nsuka.

Mu ke kwenda na Yandi na nzila ya lufundusu,

Kana Ndinga kele ya kusungama to dibuundu kele ya kusungama.

Mu ke . . .

“Kana mu kele ya kusungama, to Yandi kele ya kusungama. Konsiansi ya munu kele ya kusungama, to Ndinga ya Yandi kele ya kusungama?” Beno kele na kisika ya lufundusu ntangu yayi. “Yina mu me kwikila, ya kele kieleka, to ya kele Ndinga ya Yandi ya kieleka? Mu banza ti ya kele nyonso ya kulunga na kuvwanda na nsuki ya nkufi, kulwata bakupe? Mu banza ti ya kele nyonso ya kulunga na kuvwanda ya denomination?” Yinki Yandi tubaka?

Mu ke kwenda na Yandi, na Yandi tii na nsuka.

Ntangu yayi mu ke landa kisika Yandi ke  
twadisa munu,

Mu me telemisa maboko ya munu, mpe, Mfumu. Mfumu, kisika nyonso ya kele, wapi kisika Nsangu yina ke landa samu

na kulonga? Ya kele awa, na nkokila yayi, kuna na Afrika, na Allemagne, na Suisse? Wapi kisika ya kele, Mfumu?

Kisika Yandi . . .

Kisika nyonso Nge ke twadisa, Mfumu.

. . . mu ke landa,  
mu ke kwenda na Yandi, na Yandi tii na nsuka.

Ntangu yayi na bayintu ya beno ya kukulumusa.

<sup>230</sup> Beno ke kwenda na Yandi bisika nyonso Yandi ke twadisa beno? Beno ke kwenda na Yandi ntangu bantangu ke na kubwa na yisi, bantu ke na kotalisa mpasi, ke na kuseka, ke na kumoke? “Mu ke vwanda kaka na Yandi. Mu ke kwenda kaka. Mu ke kwenda na ntwala na Nge, Mfumu, kisika nyonso Nge kele. Mu ke vwanda kaka ya kukwikama mpe ya kieleka. Na tiya ya bitumba, mu ke vwanda kaka ya kukwikama mpe ya kieleka. Kana mu kubwa, Nge ke vumbula munu dyaka, Mfumu. ‘Yandi yina ke zimbisa luzingu ya yandi samu na luzolo ya Munu ke kuzwa yawu.’”

Na yawu mu ke kwenda na Yandi, na Yandi  
nyonso . . .

<sup>231</sup> Ntangu yayi nyonso yina zola tuba ti, na ntima ya beno, beto telemisa maboko ya beto ntangu yayi, mpe bantima ya beto, na Yandi.

Mu . . . Mu ke kwenda kisika Yandi ke twadisa  
munu,  
Mu ke landa kisika Yandi ke twadisa munu,  
Mu ke landa kisika Yandi ke twadisa munu,  
Mu ke kwenda na Yandi, na Yandi tii na nsuka.  
Yandi ke pesa munu lemvo mpe nkembo,  
Yandi ke pesa munu . . .

Mfumu Yesu, fula na zulu ya bamuswale yayi ntangu yayi. Belusa bambevo yayi mpe bantu ya mpasi, Mfumu. Pesa yawu, Mfumu. Pesa bawu kubeluka, Mfumu, na Nkumbu ya Yesu.

Mpe kwenda na munu, na munu tii na nsuka.

<sup>232</sup> Beno ke kuwa mbote ntangu yayi? Beno ke kuwa ti nyonso me kubama ntangu yayi? Kana Yandi . . .

Mpungi ya Mfumu ke wakana, mpe ntangu ke  
vwanda dyaka ve, (Ya kele Mpungi yango ya  
nsuka, ntangu yayi.)  
Mpe ntangu suka ke talana ya Kukondwa  
nsuka, ke lezima na nsemo mpe kitoko.

Beto yimba yawu, beto nyonso ntangu yayi. “Ntangu Mpungi ya Mfumu ke wakana.” Pesa beto fungula.

Ntangu Mpungi ya Mfumu ke wakana, mpe  
 ntangu ke vwanda dyaka ve,  
 Mpe suka ke talana ya Kukonda nsuka, ke  
 lezima na nsemo mpe kitoko;  
 Ntangu bantu ya kuvulusa ya ntoto ke vukana  
 na Simu yankaka,  
 Ntangu ba ke tanga liste na zulu kuna, mu ke  
 vwanda kuna.

Ntangu ba ke tanga liste na zulu kuna,  
 Ntangu ba ke tanga liste na zulu kuna,  
 Ntangu ba ke tanga liste na zulu kuna,  
 Ntangu ba ke tanga liste na zulu kuna, mu ke  
 vwanda kuna.

Na suka yango ya kulezima mpe matuti ntangu  
 mafwa na Klisto ke telama,  
 Mpe kukabula nkembo ya mvumbukulu ya  
 Yandi;  
 Ntangu luzingu ya muvimba ke suka, mpe  
 kisalu ya beto na zulu ya ntoto me salama,  
 Mpe ba ke tanga liste na zulu kuna, mu ke  
 vwanda kuna.

Ntangu ba ke tanga liste na zulu kuna,  
 Ntangu ba ke tanga liste na zulu kuna,  
 Ntangu ba ke tanga liste na zulu kuna,  
 Ntangu ba ke tanga liste na zulu kuna, mu ke  
 vwanda kuna.

<sup>233</sup> Beto telemisa maboko ya beto, beto tuba, “Na lemvo ya Nge,  
 Mfumu.” “Na lemvo ya Nge, Mfumu!”

Ntangu yayi, beto kele bampangi ya babakala mpe bampangi  
 ya bakento na Klisto. Beto baluka kaka mpe beto pesa mbote na  
 muntu yina kele pene-pene ya beno, mpe kutuba, “Na lusalusu  
 ya Nzambi, ntangu ba ke tanga liste na zulu kuna!”

Ntangu ba ke tanga liste na zulu kuna,  
 Ntangu ba ke tanga liste na zulu kuna,  
 Ntangu ba ke tanga liste na zulu kuna,  
 Ntangu ba ke tanga liste na zulu kuna, mu ke  
 vwanda kuna.

Yinki beto ke na kuvingila?

Ntangu Mpungi yina . . . (yina ya nsuka) . . . ya  
 Mfumu ke wakana, mpe ntangu ke vwanda  
 ve . . .

(Beto ke vwanda na kati ya Seko, “Na  
 mwa ntangu, na mbwetolo ya disu.”) . . . mpe  
 kulezima;

Mpe na yina ntangu bantu ya kuvulusa ya ntoto  
ke vukana, na simu yankaka,  
Ntangu ba ke tanga liste na zulu kuna, mu ke  
vwanda kuna.

Beto yimba kaka yawu!

Ntangu ba ke tanga liste na zulu kuna,  
Ntangu ba ke tanga liste na zulu kuna,  
Ntangu ba ke tanga liste na zulu kuna,  
Ntangu ba ke tanga liste na zulu kuna, mu ke  
vwanda kuna.

<sup>234</sup> Oh, ya ke vwanda ve ntangu! Beno kwenda kaka na ntwala, kilumbu mosi, mpe awa ke monika muntu. “Nani ya kele? Mama!” Amen! “Ya ke vwanda na ntangu ya yinda ve ntangu yayi.” Kaka na baminuti fyoti, beno me soba. Mpe beto ke vwanda . . . ke kutana na bawu, na manima beto ke vwanda kintwadi na bawu, samu na kukutana na Mfumu na mipepe. Oh, na mwa ntangu, na mbwetolo ya disu. Beno ke tuba, “Tala Mpangi Seward, mpangi ya bakala ya kiboba yina vwanda wandaka na dibuundu awa! Kasi, tala Mpangi DeArk. Tala Mpangi *Kingandi* . . . Mbote, tala awa, bawu nyonso kele pene-pene ya munu! Wapi dyambu? Awa kaka na baminuti fyoti . . . Mu zaba ti bawu me monika na munu. Ya ke vwanda na ntangu ya yinda ve ntangu yayi. Mu ke soba ntangu yayi, kaka na mwa ntangu fyoti, kaka mwa ntangu fyoti.” Oh, yinga! Mpe suka ke talana ya Kukonda nsuka, ke lezima na nsemo mpe kitoko. Matuti nyonso ya misitiki . . .

<sup>235</sup> Mutindu Yandi tubaka, “Israël, nge me vwanda mutindu dituti ya suka, mupepe, mpe ludedomo ya nge ke na kuzimbana.” Mpe ntangu yawu nyonso ke zimbana na kati ya Nsemo ya Mwana Yina ke simba yawu nyonso, amen, kuna, “Ba ke tanga liste na zulu kuna, mu ke vwanda kuna.” Mbote mingi.

Tii na nkokila yayi:

Tii beto ke kutana! tii beto ke kutana!

Beto zaba ve wapi ntangu yayi ke salama, bankundi. Ya me vwanda disolo, kubanda ntama, kasi ya kele Kieleka, mpe ya ke salama. Beto me kuma kaka na ntangu ntangu yayi.

Tii—tii beto ke kutana! tii beto . . .

Na lemvo ya Nzambi, beto ke sala kivuvu, na ngunga ya sambwadi na ndambu na nkokila yayi.

Nzambi kuvwanda na beno tii beto ke kutana  
dyaka.

Beto telama ntangu yayi.

<sup>236</sup> Oh, ya kele mbote ve? “Yayi kele bisika ya Mazulu na kati ya Klisto Yesu.” Mu ke sobisa ve yayi na kima mosi. Beno zaba mutindu mu zola kuloba mpe mutindu mu zola kuzomba, samu ti

mu ke monaka Nzambi kuna na ntoto ya kuyuma. Mu zola yawu. Kasi, oh, mu lendaka soba muniti mosi ve samu na yayi, na yina bimbangi nyonso ya bankama ya bamvula. Muniti mosi ya yayi, ya kele kyese!

<sup>237</sup> Nzambi, vanga na kati ya munu reveil. Ti mu vwanda reveil. Ti mosi na mosi ya beto kuvwanda reveil, reveil na kati ya munu. Sala munu, Mfumu, kuvwanda na nsatu, sala munu kuvwanda na mpwila. Vanga na kati ya munu, Mfumu, ti yina kele na nsatu na kati ya munu. Ti munu, katuka ngunga yayi, kuvwanda ya Nge; kisadi ya kupesama mingi, kisadi ya kulutula mbote, ya kusakumuna mingi na Nge; ya lenda mingi, ya kulemvuka mingi, ya lembani mingi, ya kufulukana na nsatu ya kusala; na kutalaka mingi na bima yina kele ya kieleka, mpe ke zimbana bima yina me luta, mpe ya yimbi. Bika mu landila na kukima mbangu samu na kuzwa musembo yina ba ke na kubokila beto na mazulu ya Klisto. Amen.

Yina kele nsatu ya beto, mutindu yina ve?

Mbote mingi, ti beto, tii beto ke kutana na nkokila yayi, beto baka Nkumbu ya Yesu na beto ntangu yayi, mosi na mosi ya beno ntangu yayi.

Baka—baka Nkumbu ya Yesu na nge,  
Nge mwana ya mawa mpe ya kyadi;  
Yawu ke pesaka kyese mpe ngolo,  
Baka Yawu bisika nyonso nge ke kwenda.

Nkumbu ya ntalu, Oh Nkumbu kitoko!  
Kivuvu ya ntoto mpe kyese ya Mazulu;  
Nkumbu ya ntalu, Oh Nkumbu kitoko!  
Kivuvu ya ntoto mpe kyese ya Mazulu.

Ntangu yayi beto yinika bayintu ya beto.

Baka Nkumbu ya Yesu na nge,  
Mutindu Kinwaninu ya ngolo;  
Ntangu bakumekama ke kumaka . . .



*KUZABA KILUMBU YA BENO MPE NSANGU YA YAWU* KNG64-0726M

(Recognizing Your Day And Its Message)

Nsangu yayi ya Mpangi William Marrion Branham, kulongamaka na Kingelesi, na Lumingo na suka, na kilumbu ya 26 ya Ngonda ya sambwadi, na mvula 1964, na Branham Tabernacle, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)